

LIGJI NR. 10/L-024

PËR LËNDËT PLASËSE

Kuvendi i Republikës së Kosovës:

Në bazë të nenit 65 (1) të Kushtetutës së Republikës së Kosovës,

Miraton:

LIGJ PËR LËNDËT PLASËSE

**KAPITULLI I
DISPOZITAT E PËRGJITHSHME**

**Neni 1
Qëllimi**

1. Ky ligj përcakton kushtet dhe kriteret për prodhimin, shitjen, tregtinë, transportin, magazinimin, përdorimin, asgjësimin, hulumtimin, testimin dhe vlerësimin e përputhshmërisë së lëndëve plasëse, shitjen me pakicë të artikujve piroteknikë me qëllim të mbrojtjes së jetës, shëndetit dhe sigurisë së njerëzve, kafshëve dhe bimëve, mjedisit dhe pronës, si dhe çështjet me rëndësi për kryerjen e këtyre aktiviteteve.

2. Ky ligj është pjesërisht në përputhshmëri me:

2.1. Direktivën 2013/29/EU e datës 12 qershor 2013 mbi harmonizimin e ligjeve të shteteve anëtare në lidhje me vendosjen në treg të artikujve piroteknikë;

2.2. Direktivën e Komisionit 2008/43/EC e datës 4 Prill 2008 për krijimin e një sistemi për identifikimin dhe gjurmueshmërinë e eksplozivëve për përdorim komercial në përputhje me Direktivën e Këshillit 93/15/EEC;

2.3. Direktivën 2014/28/EU e datës 26 shkurt 2014 për harmonizimin e ligjeve të shteteve anëtare në lidhje me vendosjen në treg dhe mbikëqyrjen e eksplozivëve për përdorim civil;

2.4. Direktivën Implementuese e Komisionit 2014/58/EU e datës 16 prill 2014 për krijimin e një sistemi gjurmueshmërie për artikujt piroteknikë në përputhje me Direktivën 2007/23/EC të Parlamentit Evropian dhe të Këshillit.

3. Dispozitat e këtij ligji janë gjithashtu në përputhje me marrëveshjet ndërkombëtare si në vijim:

3.1. Marrëveshjen Evropiane për Transportin Ndërkombëtar të Mallrave të Rrezikshme Rrugore (ADR);

3.2. Marrëveshjen Ndërkombëtare për Bartjen e Mallrave të Rrezikshme në Hekurudhë (RID);

3.3. Konventën për Aviacionin Civil Ndërkombëtar;

3.4. Kodin Ndërkombëtar për Bartjen e Mallrave të Rrezikshme përmes Detit.

Neni 2 Fushëveprimi

1. Dispozitat e këtij ligji janë të zbatueshme për të gjitha institucionet e Republikës së Kosovës, personat fizikë dhe juridikë të cilët merren me prodhimin, shitjen, transportin, magazinimin, përdorimin, asgjësimin, hulumtimin, testimin dhe vlerësimin e përputhshmërisë së lëndëve plasëse dhe pajisjeve inicuese, shitjes me pakicë të artikujve piroteknikë.

2. Ky ligj trajton lëndët plasëse për përdorim civil dhe për prishjen e ndërtesave, materialet e përfutuara nga energjia e çliruar gjatë reaksionit kimik me rastin e dekompozimit të lëndës plasëse, pajisjet e ndezjes së lëndëve plasëse për aktivitetet minerare, artikujt piroteknikë, municionet komerciale, barutin, produktet e mbushura me lëndë plasëse, si dhe lëndën e parë të përdorur në prodhimin e lëndëve plasëse.

Neni 3 Përjashtimet nga fusha e zbatimit

1. Dispozitat e këtij ligji nuk zbatohen për:

1.1. mjetet shpërthyes nukleare dhe biologjike;

1.2. lëndët plasëse që përdoren për inflatorët e "jastëkëve me ajër";

1.3. prodhimin e lëndëve plasëse për qëllime të analizave laboratorike, testimeve, demonstrimeve apo eksperimentimeve, por jo për përdorim praktik apo shitje, aty ku sasia totale e lëndës plasëse që prodhohet në çfarëdo kohe, nuk tejkalon njëqind (100) gram;

1.4. prodhimin apo asgjësimin e municionit të armëve të vogla, apo përgatitjen e fishekëve për përdorim me armë zjarri që përdoren në inskenimet e ngjarjeve historike, ku sasia e përgjithshme e kapsollës dhe shtytësit të përdorur për një herë nuk tejkalon dy (2) kilogram, si dhe për këto qëllime sasia e shtytësit të përdorur përfshin shtytësin e hequr nga fishekët;

1.5. lëndët plasëse dhe artikujt piroteknikë që përdoren nga institucionet e sigurisë në përputhje me legjislacionin në fuqi;

1.6. mjetet piroteknike që përdoren në fushëveprimtarinë detare, si:

1.6.1. parashutë;

1.6.2. flakadanë;

1.6.3. tymtarë;

1.6.4. pajisjet për hedhjen e litarëve në largësi të cilat për forcë shtytëse përdorin material piroteknik.

1.7. artikuj piroteknikë të destinuar për përdorim në industrinë e hapësirës ajrore;

1.8. fishekzjarrët dhe kapsollat me goditje të destinuara për lodra;

1.9. ripërpunimin e lëndëve plasëse për të formuar një produkt farmaceutik, i cili në vetvete nuk është lëndë plasëse.

Neni 4 **Përkufizimet**

1. Shprehjet, termat dhe shkurtesat e përdorura në këtë ligj kanë kuptimin si në vijim:

1.1. **MPB** – nënkupton Ministria përkatëse për punë të brendshme;

1.2. **Ministri** – nënkupton Ministri i ministrisë përkatëse për punë të brendshme;

1.3. **Akreditim** – nënkupton dëshmia e lëshuar nga organi shtetëror i akreditimit për organin e vlerësimit të përputhshmërisë që përmbush kërkesat e përcaktuara në standardet e harmonizuara, sipas legjislacionit në fuqi për standardizimin dhe, sipas rastit, çdo kërkesë shtesë, përfshirë ato të vendosura në skemat përkatëse sektoriale;

1.4. **ANFO** – nënkupton llojin e lëndës plasëse që përfitohet me përzierjen e nitratit të amonit dhe naftës;

1.5. **Artikull piroteknik** – nënkupton çdo artikull që përmban lëndë plasëse ose një përzierje të lëndëve plasëse të projektuara për të prodhuar nxehtësi, dritë, tingull, gaz ose tym ose një kombinim të këtyre efekteve nëpërmjet reaksioneve kimike ekzotermike që shkaktojnë vetë gjatë ndezjes;

1.6. **Artikuj piroteknikë për automjete** – nënkupton komponentët e pajisjeve të sigurisë në automjete që përmbajnë lëndë piroteknike, të cilat përdoren për të aktivizuar ato ose pajisje të tjera;

1.7. **Artikuj piroteknikë teatralë** – nënkupton artikujt piroteknikë të projektuar për t'u përdorur në skena të hapura ose të mbyllura, duke përfshirë produksionet e filmave dhe televizionit ose përdorime të ngjashme;

1.8. **Asgjësim i lëndëve plasëse apo artikujve piroteknikë** – nënkupton shkatërrimin përfundimtar të lëndëve plasëse përmes detonimit apo incinerimit, ose përmes konvertimit të tyre në lëndë jo plasëse me anë të procedurave të tjera, duke respektuar kriteret e sigurisë dhe kriteret e përcaktuara për vlerësimin e ndikimit në mjedis të substancave plasëse;

1.9. **Njoftimi** – nënkupton detyrimin e operatorit ekonomik ndaj autoritetit shtetëror që i njuh të drejtën të kryejë një ose disa veprime për lejimin e transferimit, eksportimit, importimit, transitimit, deponimit, përdorimit ose asgjësimit të lëndëve plasëse apo të artikujve piroteknikë;

1.10. **Baruti** – nënkupton një lëndë plasëse që digjet me përçueshmëri termike dhe është e destinuar kryesisht për shtytje të predhave;

1.11. **Certifikatë e përdoruesit fundor** – nënkupton një dokument të lëshuar me kërkesë të përdoruesit fundor, i certifikuar nga një organ kompetent i vendit të përdoruesit fundor të lëndës plasëse;

1.12. **Depo e përkohshme** – nënkupton një hapësirë e cila përmbushë kriteret e ndërtimit, ato teknike dhe të sigurisë;

1.13. **Magazinin** - nënkupton mbajtjen e lëndëve plasëse apo produkteve piroteknike gjatë prodhimit, tregtimit dhe përdorimit në mjediset e synuara për atë qëllim;

1.14. **Eksport** – nënkupton dërgimin e mallrave jashtë territorit të Republikës së Kosovës, përfshirë këtu edhe ri-eksportimin e mallrave;

1.15. **Eksportues** – nënkupton çdo person fizik ose juridik, me seli në territorin e Republikës së Kosovës, i cili eksporton lëndë plasëse ose artikuj piroteknikë që prodhohen në territorin e Republikës së Kosovës;

1.16. **Ri-eksportim** – nënkupton eksportimin e mallrave nga Republika e Kosovës që paraprakisht janë importuar në Republikën e Kosovës;

1.17. **Fishekzjarr** – nënkupton artikull piroteknik për qëllime zbavitëse;

1.18. **IATG** – nënkupton udhëzuesin ndërkombëtar teknik për municione;

1.19. **Import** – nënkupton hyrjen e mallrave ose transferimi i përkohshëm apo i përhershëm i teknologjisë në territorin e Republikës së Kosovës, përfshirë edhe ri-importin;

1.20. **Importues** – nënkupton çdo person fizik apo juridik me seli në territorin e Republikës së Kosovës, i cili vendos në treg një lëndë plasëse ose artikull piroteknik që vjen nga një vend i huaj;

1.21. **Inicuesit e lëndëve plasëse** – nënkupton të gjitha llojet e kapsollave, ndezësve dhe shkopinjve, fitilat si dhe mjetet piroteknike të cilat shfrytëzohen për iniciimin e lëndëve plasëse pa marrë parasysh mënyrën e aktivizimit;

1.22. **Inspektim** – nënkupton çdo formë kontrolli që organi kompetent kryen për verifikimin e respektimit të kërkesave ligjore nga subjekti që inspektohet;

1.23. **Kontejnerë (magazinë) portative** – nënkupton objektin për ruajtjen e municionit, barutit të gjuetisë, kapakëve të municionit të gjuetisë, mjeteve piroteknike, siguresave me djegie të ngadalshme dhe mjeteve ndihmëse për ndezjen, ku sasia e përgjithshme e barutit nuk e kalon peshën bruto prej 20 kg ose sasia e mjeteve piroteknike nuk kalon peshën prej 150 kg;

1.24. **Lëndë jofunksionale** – nënkupton lëndën plasëse, e cila nëpërmjet një procesi teknologjik kthehet në lëndë jo plasëse dhe humb plotësisht fuqinë shpërthyesë;

1.25. **Lëndë plasëse** - nënkupton substancën e ngurtë apo e lëngshme, apo përzirja e substancave, e aftë në vetvete që nëpërmjet reaksionit kimik të prodhojë gazra në temperaturë, presion dhe shpejtësi të tillë që të shkaktojë dëm në mjedis, si dhe materialet dhe artikujt që konsiderohen lëndë plasëse sipas rekomandimeve të Kombeve të Bashkuara për transportin e mallrave të rrezikshme dhe që kategorizohen në klasën 1 të këtyre rekomandimeve;

1.26. **Regjistrimi në regjistër** – nënkupton procesin i cili kërkohet nga ana e autoritetit shtetëror për të gjithë operatorët ekonomikë të cilët ushtrojnë në baza të vazhdueshme aktivitete me lëndë plasëse dhe artikuj piroteknik;

1.27. **Ndërmjetësim** – nënkupton:

1.27.1. negociatat apo marrëveshjet e transaksioneve kontraktuale për blerje, shitje ose furnizim me lëndë plasëse apo artikuj piroteknikë nga Republika e Kosovës në shtetin e huaj ose nga një shtet i huaj në shtetin tjetër; apo

1.27.2. shitja ose blerja e lëndëve plasëse apo artikujve piroteknikë në shtetin e huaj me qëllim të transferimit të tyre në shtetin tjetër të huaj.

1.28. **Ndërmjetësuesi (Broker)** – nënkupton personin që i nënshtrohet këtij ligji dhe që ofron shërbime të ndërmjetësimit. Për qëllimet e këtij ligji, “ndërmjetësimi (brokering)” konsiderohet si “shërbim i ndërlidhur”;

1.29. **Ndalim i tregtimit** – nënkupton çdo masë e marrë përgjatë të gjithë zinxhirit të furnizimit për të ndaluar vendosjen në treg të lëndëve plasëse apo artikujve piroteknikë;

1.30. **Neutralizimi** – nënkupton shndërrimin kimik të lëndës plasëse në lëndë joplasëse;

1.31. **Nitrat Amoni** – nënkupton materie kimike e cila ka pikën e shkrirjes njëqindeshtatëdhjetë (170) gradë celsius dhe zbërthehet mbi dyqindëdhjetë (210) gradë celsius;

1.32. **Numri i Kombeve të Bashkuara apo KB** – nënkupton numrin identifikues dhe shkallën e rrezikshmërisë së materialeve të rrezikshme, ndezëse dhe shpërthyesë të

përcaktuara nga Komiteti i Ekspertëve të Kombeve të Bashkuara për transportin e mallrave të rrezikshme;

1.33. Objekti (ndërtesa) e magazinimit – nënkupton një objekt të mbyllur dhe të kontrolluar me një hapësirë përkatëse, i destinuar për ruajtjen, ngarkimin ose shkarkimin e lëndëve shpërthyes apo artikujve piroteknikë, i ndërtuar dhe i pajisur për të siguruar mbrojtjen e jetës, shëndetit dhe sigurisë së njerëzve, kafshëve, bimëve, mjedisit dhe pronës;

1.34. Objekti i prodhimit – nënkupton objektin e mbyllur dhe të kontrolluar, me hapësirë përkatëse, i destinuar për prodhimin e lëndëve shpërthyes apo artikujve piroteknikë dhe i ndërtuar dhe pajisur për të siguruar mbrojtjen e jetës, shëndetit dhe sigurisë së njerëzve, kafshëve, bimëve, mjedisit dhe pronës;

1.35. Operator ekonomik – nënkupton prodhuesin, përfaqësuesin e autorizuar, importuesin, shpërndarësin dhe çdo person tjetër juridik apo fizik, i cili ka si objekt të veprimtarisë së tij magazinimin, përdorimin, transferimin, importimin, eksportimin, tregtimin ose asgjësimin e lëndëve plasëse apo artikujve piroteknikë;

1.36. Organi i vlerësimit të përputhshmërisë – nënkupton organin që kryen procesin e vlerësimit të përputhshmërisë, duke përfshirë kalibrimin e pajisjeve, testimin, certifikimin dhe inspektimin e lëndëve plasëse dhe artikujve piroteknikë;

1.37. Organ Evropian i vlerësimit – nënkupton organin e vlerësimit të përputhshmërisë, i miratuar nga një shtet anëtar i Bashkimit Evropian, i përcaktuar prej këtij të fundit në Komisionin Evropian dhe i regjistruar si trup kompetent për kryerjen e detyrave specifike të vlerësimit të përputhshmërisë së produktit për vendosjen e shenjës CE;

1.38. Specifikim teknik – nënkupton dokumentin që përshkruan kriteret teknike që duhet të përmbushë një lëndë plasëse apo një artikull piroteknik;

1.39. Person i autorizuar - nënkupton çdo person fizik ose juridik me seli në territorin e Republikës së Kosovës që është i autorizuar nga operatori ekonomik që ta përfaqësojë dhe të veprojë në emër të tij;

1.40. Produktet e mbushura me lëndë plasëse – nënkupton produkte që përmbajnë ose janë të mbushura me përzierje plasëse ose piroteknike ku efekti i tyre varet nga përbërja e materieve plasëse;

1.41. Prodhim i lëndëve plasëse apo artikujve piroteknikë – nënkupton prodhimin, përpunimin, modifikimin dhe montimin e lëndëve plasëse apo artikujve piroteknikë;

1.42. Prodhuesi – nënkupton operatorin ekonomik që prodhon lëndë plasëse ose artikull piroteknik, i cili bën të mundur projektimin ose prodhimin e lëndës dhe e tregon atë me emrin e tij apo markën tregtare, ose e përdor për qëllime të veta;

1.43. **Shënjimi CE** – nënkupton shënjimin si shenjë e detyrueshme e përputhshmërisë në shumë produkte në tregun e vetëm në Zonën Ekonomike Evropiane;

1.44. **SNSh** – nënkupton sasinë neto shpërthyesë, e njohur edhe si përmbajtje neto shpërthyesë ose peshë neto shpërthyesë e lëndës plasëse apo artikullit piroteknikë;

1.45. **Shpërndarës** – nënkupton çdo person fizik ose juridik në zinxhirin e furnizimit, i ndryshëm nga prodhuesi ose importuesi që gjatë ushtrimit të veprimtarisë së tij vendos në treg një lëndë plasëse;

1.46. **Shpërbërja** – nënkupton procedurën e çmontimit të produkteve të mbushura me lëndë shpërthyesë dhe municion, në mënyrë të tillë që lënda shpërthyesë të ndahet nga materialet joplasëse që përdoren më shpesh për riciklim dhe lënda shpërthyesë shkon për përpunim ose shkatërrim të mëtejshëm;

1.47. **Vendosja në treg** – nënkupton bërja e disponueshme për herë të parë e lëndës plasëse apo artikullit piroteknikë në tregun e Republikës së Kosovës;

1.48. **Tërheqja nga tregu** – nënkupton çdo masë të marrë nga operatori ekonomik në bashkëpunim me organet kompetente, që synon parandalimin e daljes në treg të lëndës plasëse apo artikullit piroteknikë në zinxhirin e furnizimit;

1.49. **Bërja e disponueshme në treg** – nënkupton çdo furnizim të lëndës plasëse apo artikullit piroteknikë me qëllim të shpërndarjes ose përdorimit në tregun e Republikës së Kosovës në rrjedhën e një aktiviteti tregtar;

1.50. **Trajtim i lëndëve plasëse** – nënkupton kryerjen e veprimeve në lidhje me prodhimin, testimin, magazinimin, tregtimin, transportimin apo përdorimin e lëndëve plasëse;

1.51. **Transferim** – nënkupton lëvizjen fizike të lëndës plasëse apo artikullit piroteknikë brenda territorit të Republikës Kosovës;

1.52. **Transit** – nënkupton hyrja brenda e pastaj dalja e dërgesave të mallrave nga territori i Republikës së Kosovës, të cilat janë të destinuara jashtë territorit të saj, në mënyrë të tillë që malli gjatë tërë kohës qëndron në të njëjtin mjet transportues;

1.53. **Vërtetim besueshmërie** – nënkupton aktin administrativ të MPB-së, ku dokumentohet procesi i verifikimit të dhënave të individit në raport me ato të regjistrave fizikë dhe elektronikë të të gjitha institucioneve shtetërore;

1.54. **Vlerësimi i përputhshmërisë** – nënkupton procesin nëpërmjet të cilit përcaktohet plotësimi ose jo i kriterëve thelbësore të sigurisë që kanë të bëjnë me lëndët plasëse dhe artikujt piroteknikë;

1.55. **Mjet piroteknikë** - nënkupton pajisje e përdorur për fishekzjarrë, raketa kundër breshrit dhe raketa të tjera të përdorura për qëllime shkencore, tregtare apo qëllime të tjera.

KAPITULLI II AUTORITETET KOMPETENTE

Neni 5 Kompetencat dhe përgjegjësitë

1. MPB është kompetente për:

1.1. lëshimin e lejeve për aktivitetet e prodhimit, importit, eksportit, transitit, përdorimit, magazinimit, asgjësimit, shitjes dhe transferimit të lëndëve plasëse dhe artikujve piroteknikë;

1.2. lëshimin e lejes për shitje me pakicë të artikujve piroteknikë;

1.3. dhënien e udhëzimeve dhe pëlqimin për përdorimin e lëndëve plasëse apo artikujve piroteknikë;

1.4. mbajtjen e listës së përditësuar të lëndëve plasëse apo artikujve piroteknikë;

1.5. mbajtjen e regjistrit për të gjithë operatorët ekonomikë të cilët merren me aktivitetet e rregulluara nga ky ligj;

1.6. mbajtjen e të dhënave për lëndët plasëse dhe artikujt piroteknikë dhe ofrimin e tyre organeve kompetente;

1.7. përpunimin, ofrimin dhe përdorimin e të dhënave në pajtim me legjislacionin në fuqi;

1.8. bashkëpunimin me organet dhe organizatat ndërkombëtare në aktivitetet e ndërlidhura me lëndë plasëse dhe artikuj piroteknikë;

1.9. ndalimin e prodhimit, importit, eksportit, transitit, tregtimit, magazinimit, asgjësimit dhe përdorimit të lëndëve plasëse apo artikujve piroteknikë në kundërshtim me këtë ligj;

1.10. të siguroar që operatori ekonomik si përdoruesi i fundit posedon certifikatë të përdorimi fundor.

2. Lista shtetërore për lëndët plasëse dhe artikuj piroteknikë të lejuar dhe të ndaluar përcaktohet me akt nënligjor të miratuar nga ministri i MPB-së.

3. Dogana e Kosovës është përgjegjëse për mbikëqyrjen, verifikimin dhe vlefshmërinë e shënjitimit CE dhe deklaratës se përputhshmërisë gjatë importit, eksportit dhe transitit të

lëndëve plasëse apo artikujve piroteknikë gjatë kalimit kufitar sipas lejes së lëshuar nga MPB.

4. Inspektorati i tregut dhe ministria përkatëse për tregti janë përgjegjës për të mbikëqyrur dhe verifikuar përputhshmërinë gjatë prodhimit të lëndëve plasëse, mjeteve iniciuese dhe artikujve piroteknikë lidhur me përmbushjen e kriterëve të këtij ligji dhe ligjit përkatës për standardizim.

5. MPB në bashkëpunim me institucionet e tjera qendrore ose lokale mbikëqyrëse dhe inspektuese, secila në përputhje me kompetencat e veta, marrin të gjitha masat e nevojshme për të siguruar që vendosja në treg e artikujve piroteknikë të bëhet sipas kriterëve të këtij ligji.

6. Policia e Kosovës bën përcjelljen për çdo import, eksport, transit dhe transfer të lëndëve plasëse nga pika e nisjes deri në destinacionin e fundit, sipas lejes së lëshuar nga MPB, me përjashtim të lejes për transfer të artikujve piroteknikë.

7. Procedurat e trajtimit të kërkesave nga paragrafi 6 i këtij neni për përcjellje si dhe ekzekutimi i tyre, përfshirë shpenzimet e përcjelljes, përcaktohen me akt nënligjor të miratuar nga Ministri.

8. Qeveria me akt nënligjor rregullon aktivitetet e lejuara për qëllime të çminimit me lëndë plasëse, municione dhe artikuj piroteknikë për nevoja të Forcës së Sigurisë së Kosovës.

Neni 6 Inspektorët

1. Inspektorët për lëndë plasëse dhe artikuj piroteknikë kanë statusin e nëpunësit civil, ku marrëdhënia e punës është e rregulluar sipas legjislacionit përkatës për zyrtarët publikë.

2. Inspektorët për lëndë plasëse dhe artikuj piroteknikë duhet të certifikohen duke e dhënë provimin profesional për inspektor.

3. Gjatë punës provuese dhe deri në përfundimin me sukses të trajnimit të detyrueshëm, Inspektori nuk mund të ushtrojë detyrën e inspektorit i vetëm.

4. Të gjithë inspektorët pa përjashtim ndjekin trajnimin e detyrueshëm për përditësimin e njohurive dhe aftësive profesionale specifike për inspektim dhe vetëm pas ndjekjes së trajnimit certifikohen për inspektor.

5. Inspektorët që nuk arrijnë të kalojnë testin për herë të parë kanë të drejtë t'i nënshtrohen testit deri në tre (3) herë brenda periudhës gjashtë (6) mujore.

6. Inspektorët që nuk arrijnë të kalojnë testin sipas këtij neni, nuk do të certifikohen çka përbën shkak për mos konfirmimin e punës provuese si dhe largimin e inspektorit nga shërbimi civil.

Neni 7

Të drejtat dhe detyrat e inspektorit

1. Mbikëqyrjen dhe inspektimin për zbatimin e dispozitave të këtij ligji lidhur me lëndët plasëse dhe artikuj piroteknikë në territorin e Republikës së Kosovës e kryejnë inspektorët e MPB-së.

2. Inspektori ka këto kompetenca:

2.1. të kërkojë dokumentin e identifikimit nga personat që janë prezentë me rastin e inspektimit me qëllim të vërtetimit të identitetit gjatë procedurës së inspektimit;

2.2. të hyjë lirisht për qëllim inspektimi në ndërtesa, mjedise, objekte, mjete të transportit, në të cilat, ose përmes të cilave, ushtron veprimtarinë e tij subjekti i inspektimit, si dhe të inspektojë instalimet, pajisjet, makineritë, produktet, substancat, përbërësit dhe çdo send tjetër të lidhur me veprimtarinë që është objekt i inspektimit;

2.3. të bëjë fotografime, filmime apo regjistrime të mjediseve, instalimeve, proceseve të punës dhe ndërtesave, mjeteve të transportit, pajisjeve, makinerive, produkteve, sendeve, substancave, përbërësve dhe çdo sendi tjetër që lidhet me veprimtarinë e subjektit të inspektimit;

2.4. të marrë pa pagesë dhe të përdorë për qëllim të inspektimit çdo të dhënë ose dokument për subjektin e inspektimit dhe veprimtarinë e tij, nga çdo institucion shtetëror që i disponon ato;

2.5. të marrë pa pagesë mostra të produkteve, materialeve, mallrave, substancave apo prodhimeve si në vijim:

2.5.1. mostrat merren në prani të përfaqësuesit të subjektit të inspektimit, duke shpjeguar paraprakisht procedurën e marrjes së mostrës;

2.5.2. mostra merret në sasinë e nevojshme për kryerjen e ekzaminimit apo analizave dhe për të siguruar përsëritjen e tij, nëse është e nevojshme;

2.5.3. marrja e mostrave pasqyrohet në procesverbalin e inspektimit;

2.5.4. organi inspektues detyrohet të njoftojë rezultatet e ekspertizës apo të ekzaminimit pas marrjes së rezultatit të tyre;

2.5.5. shpenzimet për përzgjedhjen, transportin dhe ekzaminimin apo analizën e mostrave mbulohen nga MPB. Këto shpenzime i barten subjektit të inspektimit vetëm nëse rezultati i ekzaminimit apo analizave provon shkeljen e dispozitave ligjore përkatëse.

2.6. në rast të shpërthimeve të veçanta verifikon koordinatat e paraqitura nga subjekti;

2.7. të administrojë çdo mjet tjetër prove, sipas ligjit në fuqi për procedurën e përgjithshme administrative, për përcaktimin e situatës faktike dhe rrethanave të nevojshme për marrjen e vendimit përfundimtar të inspektimit;

2.8. të marrë vendime të menjëhershme për ndalimin e pjeshëm ose të plotë të punës aty ku ka fakte se është duke u vepruar në kundërshtim me dispozitat ligjore dhe vendos bllomba bllokuese për mbylljen e plotë ose të pjeshëm të veprimtarisë dhe pajisjeve të punës;

2.9. të kërkojë nga subjekti i inspektimit, ose personit përgjegjës, sqarime, raporte me shkrim në lidhje me çështjet e inspektimit;

2.10. të konstatojë gjendjen faktike përmes shikimit, audio dhe video incizimit të cilat mund të shfrytëzohen në procedurën e inspektimit;

2.11. të sanksionojë subjektin, në rastet kur konstaton se janë shkelur dispozitat ligjore si dhe të iniciojë procedurë kundërvajtëse dhe penale për shkak të shkeljes së dispozitave ligjore;

2.12. të urdhërojë punëdhënësin në marrjen e veprimeve konkrete për zbatimin e dispozitave ligjore në afat të caktuar kohor;

2.13. të kërkojë asistencën policore, në rastet kur vlerëson se ka pengesa në realizimin e inspektimit;

2.14. të përshkruajë arsyen e refuzimit të nënshkrimit, në rast se punëdhënësi apo përfaqësuesi i tij refuzon ta nënshkruajë raportin zyrtar.

3. Inspektori gjatë inspektimit sigurohet që ndërhyrja e tij në funksionimin e objektit nuk mund të shkojë përtej sigurimit inspektimit efektiv.

4. Subjekti i inspektuar duhet t'i ofrojë bashkëpunim inspektorit për të gjitha çështjet që janë në funksion të inspektimit.

5. Procedura për zbatimin e këtij neni përcaktohet me akt nënligjor të miratuar nga Ministri i MPB-së.

Neni 8

Personat e autorizuar

1. Vetëm personat e autorizuar dhe kualifikuar mund të përdorin dhe magazinonjë lëndë plasëse ose artikuj piroteknikë për operatorët ekonomikë, përveç artikujve piroteknikë që shiten me pakicë tek personat fizikë.

2. Personi i autorizuar që për nevojat e operatorit ekonomik angazhohet në prodhimin, importimin, eksportimin, tregtimin, transportimin, transferimin, magazinimin, përdorimin, asgjësimin, duke përdorur ose duke trajtuar drejtpërdrejt lëndët plasëse ose artikuj piroteknikë, duhet të përmbushë kriteret si në vijim:

2.1. të ketë moshën së paku njëzetënjë (21) vjet;

2.2. të jetë i aftë në aspektin shëndetësor;

2.3. për personat mbi moshën gjashtëdhjetëepesë (65) vjeçare nevojitet pajisja me certifikatë mjekësore për aftësi në punë çdo vit;

2.4. të kenë kryer trajnimin profesional për punë me lëndë plasëse dhe artikuj piroteknikë nga neni 10 i këtij ligji, i cili ofrohet nga subjektet juridike të licencuara në ministrinë përkatëse për arsim;

2.5. të mos jetë i dënuar për vepër penale të kryer me dashje.

3. Trajnimi profesional për drejtuesit e automjeteve që transportojnë lëndë plasëse zhvillohet në përputhje me një program të veçantë dhe rregulloret e përcaktuara nga ministria përgjegjëse për transportin.

Neni 9

Detyrimet e personave të autorizuar

1. Personat e autorizuar sigurojnë prodhimin, tregtimin, përdorimin, trajtimin, magazinimin dhe asgjësimin e sigurtë të lëndëve plasëse dhe artikujve piroteknikë në pajtim me këtë ligj.

2. Prodhimi, tregtia dhe përdorimi i lëndëve plasëse apo artikujve piroteknikë iu lejohe vetëm personave profesionalisht të kualifikuar.

3. Kualifikimi nga paragrafi 2 i këtij neni vërtetohet me anë të certifikatës së kualifikimit të lëshuar nga institucionet e licensuara nga ministria përkatëse e arsimit.

Neni 10

Trajnimet për personat e autorizuar

1. Personat që angazhohen në prodhimin, importimin, eksportimin, tregtimin, transportimin, transferimin, magazinimin, përdorimin, asgjësimin duke përdorur ose trajtuar drejtpërdrejt lëndët plasëse apo artikujt piroteknikë, duhet të jenë të aftë nga ana shëndetësore dhe të trajnuar për kryerjen në mënyrë të sigurtë të këtyre veprimtarive.

2. Aftësia shëndetësore sipas paragrafit 1 të këtij neni, duhet të mbështetet nga një vërtetim i gjendjes shëndetësore.

3. Trajnimi për të gjitha punët me lëndë plasëse dhe artikujt piroteknikë kryhet sipas programit të trajnimeve të akredituar sipas legjislacionit në fuqi.

4. Trajnimi i drejtuesve të mjeteve për transportimin e lëndëve plasëse, sipas paragrafit 1 të këtij neni, si dhe pajisja me certifikatën përkatëse për transportin e mallrave të rrezikshme ofrohen sipas programit dhe mënyrës së përcaktuar nga ministria përgjegjëse për transportin.

5. Pavarësisht përcaktimeve në paragrafin 1 të këtij neni, personat e angazhuar në veprimtari ndihmëse në lidhje me prodhimin, tregtimin, magazinimin, transportimin ose përdorimin e lëndëve plasëse apo artikujve piroteknikë nuk kanë nevojë të kenë kualifikim teknik dhe vërtetim të aftësisë, pormund të përfshihen në veprimtaritë e sipas neni 1 të këtij ligji, vetëm me dëshminë e pjesëmarrjes në trajnime të mbajtura nga institucione të akredituara si dhe të deklarohen me shkrim se janë informuar rreth rreziqeve dhe rregullave të sigurisë në vendin e punës.

6. Për zbatimin e këtij neni Ministri i MPB-së nxjerr akt nënligjor.

Neni 11

Masat e sigurisë

1. Operatorët ekonomikë në aktivitete me lëndë plasëse dhe artikuj piroteknikë duhet të mbrojnë jetën dhe shëndetin e njerëzve dhe pronën e tyre, si dhe të marrin të gjitha masat e sigurisë të përcaktuara sipas dispozitave të këtij ligji dhe legjislacionit përkatës për masat e sigurisë në punë.

2. Operatorët ekonomikë për mënyrën e zbatimit të masave sipas paragrafit 1 të këtij neni nxjerrin rregullore e cila duhet të përmbajë një plan veprimi në rast aksidenti ose emergjence tjetër si shpërthim, zjarr, vjedhje, vërshime apo të ngjashme.

3. Operatorët ekonomikë njoftojnë për masat e përcaktuara në rregulloren sipas paragrafit 2 të këtij neni të gjithë personat që kryejnë aktivitete për llogari të tyre dhe tu mundësojnë atyre trajnimin e duhur për të vepruar në rast aksidenti.

4. Objektet për prodhimin ose magazinimin e lëndëve plasëse apo artikujve piroteknikë duhet të jenë në mbrojtje të përhershme fizike ose teknike, në përputhje me rregulloret e veçanta që rregullojnë fushën e mbrojtjes fizike dhe teknike.

5. Operatorët ekonomikë për objektet në të cilat prodhojnë, magazinojnë apo tregtojnë, duhet të pajisen me Certifikatën e Sigurisë nga Zjarri.

6. Operatorët ekonomikë që prodhojnë, tregtojnë ose përdorin lëndë plasëse apo artikuj piroteknikë, përpara se të ndërpresin veprimtarinë e tyre, duhet t'i asgjësojnë apo t'ia shesin ose t'ia transferojnë lëndët plasëse subjektit tjetër që është i regjistruar për prodhimin, tregtimin ose përdorimin e tyre, si dhe të përmbushin të gjitha detyrimet e përcaktuara me këtë ligj.

7. Për zbatimin e këtij neni Ministri i MPB-së nxjerr akt nënligjor.

KAPITULLI III LËNDËT PLASËSE

Neni 12 Vendosja në treg e lëndëve plasëse

1. Operatori ekonomik parashton kërkesë në MPB për lejimin e vendosjes në treg të lëndëve plasëse.
2. Kriteret për vendosjen në treg të lëndëve plasëse janë:
 - 2.1. deklarata e përputhshmërisë sipas nenit 15 të këtij ligji;
 - 2.2. udhëzimet për përdorimin dhe shkatërrimin e sigurtë të lëndëve plasëse dhe paketimit;
 - 2.3. informacioni për mënyrën e etiketimit të lëndëve plasëse.
3. Lëndët plasëse mund të transportohen, të vendosen në treg dhe të përdoren vetëm në paketim origjinal dhe të shënuara në përputhje me dispozitat e këtij ligji.

Neni 13 Identifikimi dhe gjurmimi i lëndëve plasëse

1. Operatorët ekonomikë duhet të zbatojnë një sistem uniform për identifikimin dhe gjurmueshmërinë unike të lëndëve plasëse që merr parasysh madhësinë, formën ose modelin e tyre, përveç rasteve kur nuk është e nevojshme të vendoset një identifikim unik në lëndët plasëse për shkak të nivelit të ulët të rrezikshmërisë, bazuar në karakteristikat dhe faktorët si pasojat e lehta në rast shpërthimi, përdorimit të tyre dhe rrezikut të ulët për sigurinë për shkak të pasojave të lehta në rast të keqpërdorimit.
2. Sistemi uniform i identifikimit nuk zbatohet për lëndët plasëse që transportohen dhe dorëzohen të pa ambalazhuara, ose në kamionë me pompa për shkarkimin e tyre të drejtpërdrejtë në vrimën e shpërthimit, ose për lëndët plasëse të prodhuara në vendet e shpërthimit dhe që përdoren menjëherë pas prodhimit, pra prodhimi në vend.
3. Ky sistem siguron grumbullimin dhe ruajtjen e të dhënave edhe përmes mjeteve elektronike, duke mundësuar identifikimin unik dhe gjurmimin e lëndës plasëse, si edhe vendosjen e një identifikimi unik mbi lëndën plasëse dhe/ose në paketimin e saj që mundëson qasje në ato të dhëna. Këto të dhëna lidhen me identifikimin unik të lëndës plasëse, duke përfshirë vendndodhjen e saj përderisa është në zotërim të operatorëve ekonomikë si dhe identitetin e operatorit ekonomik.
4. Të dhënat nga paragrafi 3 i këtij neni testohen në intervale të rregullta dhe mbrohen nga dëmtimet ose shkatërrimet aksidentale ose të qëllimshme.

5. Këto të dhëna ruhen për dhjetë (10) vjet pas kryerjes së transaksionit, përdorimit ose asgjësimit edhe nëse operatori ekonomik ka ndërprerë aktivitetin me lëndët plasëse dhe i vihen në dispozicion menjëherë autoriteteve kompetente, në bazë të kërkesës.

6. Për zbatimin e këtij neni Ministri i MPB-së nxjerr akt nënligjor.

Neni 14

Procedura e vlerësimit të përputhshmërisë

1. Për vlerësimin e përputhshmërisë së lëndëve plasëse, operatori ekonomik duhet të ndjekë një nga procedurat e mëposhtme:

1.1. Procedurën sipas modelit të BE-së dhe sipas zgjedhjes të operatorit ekonomik, një nga procedurat më poshtë:

1.1.1. përputhshmërinë sipas llojit, e bazuar në kontrollin e brendshëm të prodhimit dhe kontrollet e mbikëqyrura të produktit në intervale të rastësishme;

1.1.2. përputhshmërinë sipas llojit, e bazuar në sigurimin e cilësisë së procesit të prodhimit;

1.1.3. përputhshmërinë sipas llojit, e bazuar në sigurimin e cilësisë së produktit;

1.1.4. përputhshmërinë e bazuar në verifikimin e produktit.

1.2. përputhshmërinë e bazuar në verifikimin individual të produktit.

2. Procedura për vlerësimin e përputhshmërisë përcaktohet me akt nënligjor të nxjerrë nga Ministri i MPB-së.

Neni 15

Deklarata e përputhshmërisë

1. Deklarata e përputhshmërisë e hartuar nga operatori ekonomik për lëndët plasëse duhet të përmbajë kriteret thelbësore të sigurisë dhe sipas formatit të përcaktuar me akt nënligjor të nxjerrë nga Ministri i MPB-së.

2. Me nënshkrimin e deklaratës së përputhshmërisë operatori ekonomik merr përsipër përgjegjësinë për përputhshmërinë e produktit me dispozitat e këtij ligji.

Neni 16

Rregullat dhe kushtet për vendosjen e shenjës CE

1. Shenja CE duhet të vendoset në mënyrë të dukshme të lëndët plasëse, të jetë e lexueshme dhe e pashlyeshme. Kur kjo është e pamundur, shenjimi duhet vendoset në ambalazh dhe në dokumentet shoqëruese.

2. Shenja CE duhet të fiksohet përpara se lënda plasëse të vendoset në treg.
3. Shenja CE shoqërohet nga një numër identifikimi i organit evropian të vlerësimit të përputhshmërisë që është përfshirë në fazën e kontrollit të prodhimit.
4. Numri i identifikimit vendoset nga vetë organi ose sipas udhëzimeve të tij nga ana e prodhuesit ose përfaqësuesit të autorizuar të këtij të fundit.
5. Shenja CE dhe numri i organit evropian të vlerësimit të përputhshmërisë, kur është e mundur, shoqërohet edhe nga një shenjë tjetër që tregon rrezik apo përdorim të veçantë.
6. Për zbatimin e këtij neni Ministri i MPB-së nxjerr akt nënligjor.

Neni 17 **Organet e vlerësimit të përputhshmërisë**

1. Vlerësimi i përputhshmërisë së lëndëve plasëse bëhet nga vetë prodhuesi nëpërmjet një organi evropian të vlerësimit të përputhshmërisë.
2. Lënda plasëse mund të vendoset në treg nëse i përmbush të gjitha standardet e sigurisë dhe nëse organi evropian i vlerësimit të përputhshmërisë vërteton përputhshmërinë me kriteret e përcaktuara në standardet e harmonizuara të Bashkimit Evropian.

KAPITULLI IV **LEJET**

NËNKAPITULLI 1 **LLOJET E LEJEVE DHE KUSHTET E PËRGJITHSHME**

Neni 18 **Lejet për lëndët plasëse dhe artikujt piroteknikë**

1. MPB lëshon leje sipas kërkesës së operatorit ekonomik, si në vijim:
 - 1.1. leje për testim të lëndëve plasëse;
 - 1.2. leje për prodhim të lëndëve plasëse;
 - 1.3. leje për kërkim dhe hulumtim të lëndëve plasëse;
 - 1.4. leja për shpërthim të lëndëve plasëse;
 - 1.5. leje për import, eksport, transit ose transferimin të lëndëve plasëse;
 - 1.6. leje për asgjësim të lëndëve plasëse;
 - 1.7. leje për magazinim të lëndëve plasëse;

- 1.8. leje për shitje të lëndëve plasëse;
- 1.9. leje për testim të artikujve piroteknikë;
- 1.10. leje për kërkim dhe hulumtim të artikujve piroteknikë;
- 1.11. leje për prodhim të artikujve piroteknikë;
- 1.12. leje për import, eksport, transit ose transferimin e artikujve piroteknikë;
- 1.13. leje për asgjësim të artikujve piroteknikë;
- 1.14. leje për magazinim të artikujve piroteknikë;
- 1.15. leje për ndezje profesionale të artikujve piroteknikë të kategorisë F4, T2 dhe P2;
- 1.16. leje për dyqan të shitjes me pakicë të mjeteve piroteknike.

2. Lejet mund të jepen për një ose më shumë veprimtari, për një periudhë pesë (5) vjeçare, varësisht nga kërkesa e operatorit ekonomik dhe plotësimi i kriterëve të përgjithshme dhe të veçanta të përcaktuara me këtë ligj.

3. Procedura për pajisje me leje sipas kriterëve të përgjithshme dhe të veçanta si dhe rregullat e tjera sipas këtij ligji, përcaktohet me akt nënligjor të miratuar nga Ministri i MPB-së.

Neni 19 **Kriteret e përgjithshme për pajisje me leje**

1. Për tu pajisur me leje sipas nenit 18 të këtij ligji, personi fizik apo juridik duhet të plotësojë kriteret si më poshtë:

- 1.1. të ketë certifikatën e regjistrimit të biznesit;
- 1.2. të ketë dëshmi nga gjykata se personit nuk i është ndaluar ose ndërprerë aktiviteti me vendim të formës së prerë;
- 1.3. të ketë garancionin bankar pesë (5) vjeçar me vlerë të dhjetëmijë (10.000) Euro;
- 1.4. personi i autorizuar të plotësojë kriteret nga neni 8 i këtij Ligji.

NËNKAPITULLI 2

KRITERET E VEÇANTA PËR PAJISJE ME LEJE PËR LËNDË PLASËSE

Neni 20

Leja për testimin e lëndëve plasëse

1. Operatori ekonomik ose prodhuesi mund të kryejë teste të lëndëve plasëse për nevojat e tyre profesionale në procedurën e vlerësimit të përputhshmërisë, pasi të kenë marrë lejen për testim.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të ketë të angazhuar persona të kualifikuar që do të trajtojnë lëndët plasëse gjatë testimit;

2.2. të ketë lejen e posedimit apo të përdorimit të laboratorit për testim të lëndëve plasëse;

2.3. të ketë në pronësi apo të drejtën për të përdorur hapësirën ose objektin për testimin e lëndëve plasëse në vendin ku kryhet testimi;

2.4. të ketë në pronësi, ose lejen për të përdorur magazinën për qëllime të përcaktuara;

2.5. leje të magazinimit ose dëshmi të posedimit të një magazine të përkohshme të ndërtuar brenda laboratorit të testimit.

3. Operatori ekonomik që kryen testimin e lëndës plasëse sipas paragrafit 1 të këtij neni duhet të njoftojë MPB-në për marrjen e mostrave të lëndës plasëse për qëllime të testimit, jo më vonë se shtatëdhjetë (72) orë para testimit.

4. Nëse një operator ekonomik ka lejen për prodhim të lëndëve plasëse, mund të kryejë teste të lëndëve plasëse me qëllim të kontrollit të prodhimit të tij pa leje testi.

Neni 21

Leja për prodhim të lëndëve plasëse

1. Operatori ekonomik mund të fillojë prodhimin e lëndëve plasëse pasi të jetë pajisur me lejen për prodhimin e lëndëve plasëse.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të jetë i pajisur me leje për magazinim;

2.2. të jetë i pajisur me lejen e ndërtimit për objektet ku prodhohen lëndët plasëse;

- 2.3. të ketë pëlqim mjedisor;
- 2.4. të ketë leje mjedisore;
- 2.5. të ketë plan emergjent të aprovuar nga organi kompetent;
- 2.6. të ketë plan të sigurisë së vendndodhjes, të aprovuar nga organi kompetent;
- 2.7. të ofrojë të dhënat për llojin e lëndëve plasëse që planifikohen të prodhohen;
- 2.8. të ofrojë të dhënat për procesin dhe teknologjinë e prodhimit;
- 2.9. të ketë të angazhuar persona të autorizuar dhe të kualifikuar;
- 2.10. të ketë të dhënat teknologjike mbi procesin e prodhimit;
- 2.11. të ketë të dhënat për sistemin e vetëkontrollit të cilësisë;
- 2.12. të ketë dëshmitë për plotësimin e kushteve nga neni 11 paragrafët 1, 2, 3, 6 këtij ligji.

3. Në bazë të lejes së lëshuar për prodhim, lënda plasëse e prodhuar i nënshtrohet testimit pas gjashtë (6) muajve në vitin e parë dhe përsëritet testimi çdo dymbëdhjetë (12) muaj.

4. Kriteret nga paragrafi 2 i këtij neni nuk vlejné për:

- 4.1. prodhimin e lëndëve plasëse për qëllime të analizave laboratorike, testimin, demonstrimin ose eksperimentin ku sasia totale e lëndëve plasëse që prodhohet në çdo kohë nuk tejkalon njëqind (100) gram;
- 4.2. prodhimin ose asgjësimin e municionit të armëve të vogla ose përgatitjen e fishekëve për përdorim me armë zjarri, që përdoren për shënim të ngjarjeve historike, ku sasia totale e mbushësit dhe shtytësit të përdorur në çdo kohë nuk tejkalon dy (2) kilogram dhe për këto qëllime sasia e shtytësit të përdorur përfshin shtytësin e larguar nga fisheku;
- 4.3. përgatitjen e mbushjeve për shkrepje në lidhje me përdorimin e tyre;
- 4.4. përgatitjen, montimin, çmontimin dhe vendosjen e kapsollës në përdorimin e fishekzjarrëve në vendet e planifikuara për përdorim;
- 4.5. përgatitjen, montimin dhe aktivizimin e kapsollës së fishekzjarrëve, në sasi deri në dhjetë (10) kilogram, në çdo kohë, në vendin ku personi juridik posedon lejen për magazinim të lëndëve plasëse për qëllim të përdorimit të fishekzjarrëve;
- 4.6. përgatitjen, montimin dhe aktivizimin e kapsollës së lëndës plasëse për përdorim në shfaqje teatrale, televizive ose kinematografike;

4.7. ripërpunimin e lëndëve plasëse për të formuar një produkt farmaceutik që në vetvete nuk është lëndë plasëse;

4.8. përzierjen për përdorim të menjëhershëm të nitratis të amonit me karburant, ose lëndëve plasëse nga nitrati i amonit me substancë tjetër në minierë ose gurëthyes, për të prodhuar lëndë plasëse që nuk ndizet me kapsollë;

4.9. përdorimin e lëndëve plasëse joshpërthyesë në prodhim të produkteve të cilët nuk janë lëndë plasëse;

4.10. prodhimi i lëndëve plasëse nga një kompani që është në lidhje pronësie me një kompani tjetër në të njëjtën vendndodhje, dhe e cila ka leje për prodhim të lëndëve plasëse dhe prodhimi është në pajtim me kushtet e asaj leje.

5. Kriteret për magazinimin e nitratis të amonit dhe llojeve tjera të plehrave kimike që përmbajnë azot përcaktohen me akt nënligjor të miratuar nga ministri i MPB-së.

Neni 22

Prodhimi i lëndëve plasëse

1. Prodhimi i lëndëve plasëse është procesi që përfshin ruajtjen e lëndëve të para plasëse, prodhimin, përpunimin, përfundimin, transportin dhe ruajtjen e produkteve përfundimtare të lëndëve plasëse nga prodhuesi brenda hapësirës së prodhimit, në përputhje me dispozitat e këtij ligji.

2. Lëndët plasëse mund të ruhen vetëm në ndërtesa dhe ambiente të destinuara për magazinimin e lëndëve plasëse dhe nuk mund të kalojnë kapacitetin maksimal të lejuar për ruajtje.

3. Ndërtesat në të cilat prodhohen apo ruhen lëndët plasëse, duhet të jenë të ndërtuara sipas dispozitave të përcaktuara me legjislacionin përkatës për ndërtim.

4. Modifikimet në projektim ose në instalimet e prodhimit që janë të lidhura me standardet e harmonizuara të lëndës plasëse apo ndryshimet në specifikimet teknike duhet të jenë pjesë e lejes mjedisore.

5. Prodhuesit janë të detyruar që dokumentacionin teknik dhe deklaratën e përputhshmërisë ta ruajnë për një periudhë dhjetë (10) vjeçare pasi lënda plasëse është vendosur në treg.

Neni 23

Leja për kërkim dhe hulumtim të lëndëve plasëse

1. Prodhuesit e lëndëve plasëse si dhe institucionet shkencore mund të bëjnë kërkim dhe hulumtim të lëndëve plasëse, pasi të jenë pajisur me leje për kërkim dhe hulumtim të lëndëve plasëse.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

- 2.1. operatori ekonomik duhet të jetë i regjistruar në regjistrin shtetëror ose personi përgjegjës duhet të jetë pjesë në një institucion shkencor që ka një veprimtari të regjistruar për të cilën është kërkuar leja;
 - 2.2. të ketë të drejtën e shfrytëzimit të objektit në të cilin do të kryhet kërkimi dhe hulumtim i lëndëve plasëse;
 - 2.3. të jetë i pajisur me leje magazinimi për objektin në të cilin do të bëhet magazinimi i lëndëve plasëse;
 - 2.4. të kenë raportin teknologjik mbi procedurën e kërkimit dhe hulumtimit;
 - 2.5. të plotësojnë kriteret nga neni 11, paragrafët 1, 2, 3, 6;
 - 2.6. të ketë një sistem të vetin të kontrollit të cilësisë.
3. Prodhuesit e lëndëve plasëse, të cilët kanë leje të vlefshme prodhuese, nuk kanë nevojë të përmbushin kriterin nga nën paragrafi 2.6 i këtij neni.

Neni 24 **Leja për shpërthim**

1. Operatori ekonomik mund të fillojë aktivitetet e shpërthimeve pasi që të jetë pajisur me lejen për shpërthim të lëndëve plasëse.
2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:
 - 2.1. të ketë të punësuar të paktën një person që ka certifikim të specifikuar sipas llojit të kërkesës për shpërthim, i cili po ashtu është edhe personi përgjegjës për operacionin e shpërthimit;
 - 2.2. të ketë në posedim, ose të gëzojë të drejtën e përdorimit të magazinës për ruajtjen e lëndëve plasëse të nevojshme për operacionet e shpërthimit;
 - 2.3. të ofrojë të dhënat për llojin dhe sasinë e lëndëve plasëse të cilat janë planifikuar të përdoren në shpërthim;
 - 2.4. të ofrojë planin e sigurisë së lokacionit;
 - 2.5. të ketë kryer vlerësimin e rrezikut të përgatitur nga personat e kualifikuar;
 - 2.6. të ketë planin emergjent të përgatitur nga personat e kualifikuar;
 - 2.7. të ketë autorizim mjedisor.

3. Para aprovimit të lejes për shpërthim, lokacioni inspektohet nga inspektorët e MPB-së dhe në bazë të raportit të inspektimit merret vendimi për kërkesën e lejes së shpërthimit.

4. Leja e lëshuar për shpërthim është e vlefshme për një (1) apo më shumë ditë, sipas aprovimit nga MPB.

5. Çdo shpërthim sipas lejes kryhet në koordinim me organet përkatëse të ruajtjes së hapësirës ajrore të Republikës së Kosovës.

6. Shpërthimi mund të kryhet vetëm në lokacionin për të cilin MPB ka lëshuar lejen përkatëse.

7. Leja për kryerjen e aktiviteteve të shpërthimit në miniera sipërfaqësore dhe miniera nëntokësore si dhe çdo lloj shpërthimi që ka të bëjë me infrastrukturën e minierave lëshohen nga autoriteti kompetent për miniera sipas kriterëve të përcaktuara në paragrafin 2 të këtij neni dhe ligjit përkatës për miniera dhe minerale.

Neni 25 **Llojet e shpërthimeve**

1. Llojet e shpërthimeve janë:

1.1. shpërthimi sipërfaqësor, që mund të jenë:

1.1.1. shpërthimi në miniera sipërfaqësore;

1.1.2. shpërthimi për qëllim ndërtimi;

1.1.3. shpërthimi për thërrmim të shkëmbinjve;

1.1.4. shpërthimi për qëllime të shpyllëzimit.

1.2. shpërthimi nëntokësor, që përfshin të gjitha aktivitetet e shpërthimeve nëntokësore që kanë për qëllim shfrytëzimin e burimeve minerale;

1.3. shpërthimi i veçantë, që përfshin:

1.3.1. shpërthimin nënujor;

1.3.2. shpërthimin i ndërtesave të ndryshme;

1.3.3. shpërthimin kërkimor sizmik;

1.3.4. shpërthimin për qëllime teknologjike;

1.3.5. shpërthimin e sipërfaqeve të akullit në lumenj dhe liqene;

1.3.6. shpërthimin gjatë ndërtimit të tuneleve dhe objekteve të tjera nëntokësore, me përjashtim të shpërthimeve nëntokësore.

1.4. shpërthimi i çminimit që përfshin të gjitha shpërthimet që kryhen në kuadër të aktiviteteve të çminimit.

Neni 26

Detyrimet e operatorit për shpërthim

1. Gjatë kryerjes së shpërthimit sipas nenit 25, operatorët ekonomikë janë të detyruar të marrin të gjitha masat e sigurisë dhe të kryejnë shpërthimin sipas planit të shpërthimit dhe sipas rregullave të profesionit në mënyrë që shpërthimi të mos rrezikojë jetën dhe shëndetin e njerëzve, pronën e tyre dhe mjedisin dhe pas shpërthimit të përgatisin raportin e shpërthimit.

2. Planin e shpërthimit dhe raportin e shpërthimit mund ta përgatisin vetëm personat që kanë certifikim për shpërthim.

3. Për shpërthimet që kryhen në një vend të banuar ose në afërsi të një vend banimi, operatorët ekonomikë që kryejnë shpërthimin janë të detyruar:

3.1. jo më vonë se njëzetekatër (24) orë para se të kryejnë shpërthimin të njoftojnë stacionin lokal policor për vendin ku synohet të kryhet shpërthimi;

3.2. jo më vonë se njëzetekatër (24) orë para se të kryejnë shpërthimin të njoftojnë qytetarët nëpërmjet mjeteve të komunikimit publik.

4. Në rast të shpërthimit në afërsi të objekteve të rrugëve, hekurudhave, depozitave të karburanteve, tubacioneve të ujit, linjave elektrike ose telefonike dhe të ngjashme operatori ekonomik duhet të njoftojnë me shkrim personat juridik që administrojnë objektet e lartpërmendura tre (3) ditë para shpërthimit.

5. Operatori ekonomik që përdor lëndët plasëse është i detyruar që lëndët plasëse të përdorura në ambalazhin e tyre origjinal t'i kthejë në magazinë ose t'i shkatërrojë sipas udhëzimeve të prodhuesit, në mënyrë që të mos rrezikohet jeta, shëndeti dhe siguria e njerëzve dhe kafshëve, të mirat materiale dhe mjedisi.

Neni 27

Leja për import, eksport, transit dhe transferim të lëndëve plasëse

1. Operatori ekonomik mund të fillojë aktivitetet e importit, eksportit, transitit dhe transferimit të lëndëve plasëse vetëm pasi të jetë pajisur me leje për import, eksport, transit ose transferim të lëndëve plasëse.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

- 2.1. të këtë lejen e importit ose transitit të vendit në të cilin lëndët plasëse janë duke u eksportuar ose përmes të cilit është duke u bërë transiti i tyre;
 - 2.2. të këtë certifikatën e përdoruesit të fundit, nëse kërkohet;
 - 2.3. të këtë lejen për transport rrugor për mallra të rrezikshme të lëshuar nga ministria përkatëse e infrastrukturës;
 - 2.4. të këtë lejen për magazinim të lëndëve plasëse.
3. Në kërkesën për pajisje me leje nga paragrafi 1 i këtij neni operatori ekonomik duhet të ofrojë informatat si në vijim:
- 3.1. emrin e lëndës plasëse dhe numrin identifikues të KB-së;
 - 3.2. emrin dhe adresën e prodhuesit;
 - 3.3. emrin dhe adresën e shitësit ose dërguesit të lëndëve plasëse dhe emrin dhe adresën e blerësit ose pranuesit të lëndëve plasëse;
 - 3.4. emrin dhe adresën e vozitësit të automjetit, tipin e automjetit dhe numrin e targave të automjetit;
 - 3.5. sasinë e lëndëve plasëse;
 - 3.6. tabelën e të dhënave të sigurisë;
 - 3.7. informatat identifikuese të lëndëve plasëse;
 - 3.8. datën dhe kohën e importit, eksportit dhe transitit;
 - 3.9. kohën dhe vendin e ndalesave të parashikuara;
 - 3.10. hyrjen dhe daljen në kalimin kufitar dhe rrugën e transportit;
 - 3.11. qëllimin e transferimit.
4. Leja për eksport, transit ose transferim vlen në afatin kohor prej tridhjetë (30) ditësh.
5. Leja për transferim të lëndëve plasëse nga paragrafi 4 i këtij neni është e vlefshme në rast të kthimit të lëndëve plasëse të papërdorura në magazinën nga e cila është bërë transferi në fjalë.
6. Leja për import vlen në afatin kohor prej nëntëdhjetë (90) ditësh.
7. Leja për transferim të lëndëve plasëse lëshohet vetëm pasi operatori ekonomik të pajiset me leje për shpërthim apo leje të shitjes.

8. Në rast të rrezikimit të sigurisë publike dhe për të parandaluar posedimin dhe përdorimin ilegal të lëndëve plasëse, MPB kufizon ose ndalon importin, eksportin, transitin ose transferimin e tyre.

Neni 28

Leja për asgjësim të lëndëve plasëse

1. Operatori ekonomik mund të fillojë aktivitetet e asgjësimit të lëndëve plasëse pasi të jetë pajisur me lejen për asgjësim të lëndëve plasëse.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të ketë vendin e asgjësimit të miratuar nga MPB-ja;

2.2. të ketë planin e asgjësimit të miratuar nga MPB;

2.3. të ketë autorizimin mjedisor.

3. Leja për asgjësim është e vlefshme për një (1) apo më shumë ditë, sipas aprovimit nga MPB.

4. Në varësi të përbërjes së lëndës plasëse, rreziqet e asgjësimit, lloji dhe pozita e vendndodhjes së hedhjes zgjidhet dhe përdorimi i njërës nga metodave të asgjësimit si:

4.1. djegia;

4.2. shpërthimi;

4.3. tretja me një tretës; ose

4.4. shkatërrim kimik.

5. Ndalohet grosposja dhe hedhja në lumenj apo liqene e lëndëve plasëse.

6. Lëndët plasëse të papërdorura me rastin e shpërthimit që janë sjellë nga vendi i magazinimit sipas lejes së transferimit nuk kthehen prapa në vendin e magazinimit, por asgjësohen në lokacionin e shpërthimit pa pasur nevojë për kërkesën nga paragrafi 1 i këtij neni.

7. MPB vendos në lidhje me kërkesën për asgjësim brenda tridhjetë (30) ditësh.

Neni 29

Leja për magazinim të lëndëve plasëse

1. Operatori ekonomik mund të bëjë magazinimin e lëndëve plasëse vetëm pasi të jetë pajisur me leje.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

- 2.1. të ketë lejen e ndërtimit për objekte të lëshuara nga autoriteti kompetent;
- 2.2. të ketë planin e projektit të projektuar nga studio projektuese sipas legjislacionit për ndërtim;
- 2.3. të ketë bërë vlerësimin e rrezikut për magazinim të hartuar nga kompania apo persona fizikë të certifikuar;
- 2.4. të ketë planin e sigurisë të hartuar nga kompani apo persona fizikë të certifikuar;
- 2.5. të ketë listën për llojin e lëndëve plasëse që magazinohen sipas numrit KB dhe sasisë së propozuar.

3. Sasia e lejuar e ruajtjes së lëndëve plasëse në lokacion përcaktohet sipas standardeve të udhëzuesit ndërkombëtar teknik për municione dhe klasifikim të rrezikshmërisë sipas KB-së.

4. Klasifikimi i rrezikshmërisë sipas KB-së dhe grupet e përshtatshmërisë për lëndët plasëse përcaktohen me akt nënligjor të miratuar nga Ministri i MPB-së.

5. Lokacioni për magazinim inspektohet rregullisht nga MPB për përmbushjen e kriterëve ligjore të lejes me qëllim që të sigurojë mbrojtjen e shëndetit dhe jetës së personave, si dhe mbrojtjen e pronës, kafshëve dhe mjedisit.

6. MPB vendos në lidhje me kërkesën brenda tridhjetë (30) ditëve.

Neni 30

Leja për shitjen e lëndëve plasëse

1. Operatorët ekonomikë mund të bëjnë shitjen e lëndëve plasëse pasi të jenë pajisur me leje për shitjen e lëndëve plasëse nga MPB-ja.

2. Përveç kriterëve të përgjithshme, operatori ekonomik duhet të jetë i pajisur me lejen për magazinim.

3. Operatorët ekonomikë mund të bëjnë shitjen e lëndëve plasëse vetëm për operatorët e tjerë ekonomikë që kanë leje për prodhim, përdorim apo importim të lëndëve plasëse.

4. MPB vendos në lidhje me kërkesën brenda tridhjetë (30) ditësh.

KAPITULLI V ARTIKUJT PIROTEKNIKË

Neni 31 Lëvizja e lirë

1. Lëvizja e lirë e produkteve piroteknike, bëhet në përputhje me legjislacionin në fuqi.
2. Në rast të panairove, ekspozitave apo manifestimeve për reklamim të produkteve piroteknike, operatori ekonomik merr leje nga MPB.
3. Gjatë ngjarjeve sipas paragrafit 2 të këtij neni, operatori ekonomik ndërmerr të gjitha masat e sigurisë në përputhje me dispozitat e këtij ligji.
4. MPB nuk pengon lëvizjen e lirë të produkteve piroteknike të prodhuara për qëllime kërkimore, zhvillimore dhe testuese edhe nëse nuk janë në pajtueshmëri me këtë ligj por që kanë shenja të dukshme që vërtetojnë këto qëllime.

Neni 32 Vendosja në treg e artikujve piroteknikë

1. Operatori ekonomik bën kërkesë për lejimin e vendosjes në treg të artikujve piroteknikë.
2. Kriteret të cilat duhet plotësuar nga operatori ekonomik për vendosjen në treg të artikujve piroteknikë janë:
 - 2.1. deklaratën e përputhshmërisë sipas nenit 40 të këtij ligji;
 - 2.2. udhëzime për përdorimin dhe shkatërrimin e sigurtë të artikujve piroteknikë dhe paketimit të tyre;
 - 2.3. informacion për mënyrën e etiketimit të artikujve piroteknikë.
3. Artikujt piroteknikë mund të transportohen, të vendosen në treg dhe të përdoren vetëm në paketim origjinal, të vlerësuara dhe shënuara në përputhje me dispozitat e këtij ligji.
4. MPB mund të marrë të gjitha masat për të ndaluar ose për të kufizuar zotërimin, përdorimin dhe shitjen për publikun e gjerë të artikujve piroteknikë të kategorive F2 dhe F3, artikujve piroteknikë teatralë dhe artikujve të tjerë piroteknikë kur këto masa justifikohen për arsye të sigurisë publike, shëndetit dhe sigurisë ose mbrojtjes së mjedisit.

Neni 33 Kategoritë e artikujve piroteknikë

1. Artikujt piroteknikë kategorizohen nga prodhuesi sipas llojit të përdorimit ose qëllimit dhe nivelit të rrezikut, duke përfshirë edhe nivelin e tyre të zhurmës, si më poshtë:
 - 1.1. fishekzjarrët me kategoritë si në vijim:

1.1.1. kategoria F1 – fishekzjarrët që paraqesin rrezik shumë të ulët e nivele zhurme të papërfillshme dhe që kanë për qëllim të përdoren në ambiente të izoluara, duke përfshirë fishekzjarrët që kanë për qëllim të përdoren brenda vendbanimeve;

1.1.2. kategoria F2 – fishekzjarrët që paraqesin rrezik të ulët e nivele të ulëta zhurme dhe që kanë për qëllim të përdoren jashtë në ambiente të izoluara;

1.1.3. kategoria F3 – fishekzjarrët që paraqesin rrezik të mesëm, të cilët kanë për qëllim të përdoren në ambiente të hapura dhe të mëdha e që kanë nivel të zhurmës që nuk dëmton shëndetin e njeriut;

1.1.4. kategoria F4 – fishekzjarrët që paraqesin rrezik të lartë që zakonisht njihen si fishekzjarrë për përdorim profesional të cilët kanë për qëllim të përdoren vetëm nga personat me njohuri të specializuara dhe që kanë nivel të zhurmës që nuk dëmton shëndetin e njeriut.

1.2. artikujt piroteknikë teatralë me kategoritë si në vijim:

1.2.1. kategoria T1 – artikuj piroteknikë për përdorim skenik që paraqesin rrezik të ulët;

1.2.2. kategoria T2 – artikuj piroteknikë për përdorim skenik, që kanë për qëllim të përdoren vetëm nga persona me njohuri të specializuara;

1.3. artikuj të tjerë piroteknikë me kategoritë si në vijim:

1.3.1. kategoria P1 – artikuj piroteknikë që nuk u përkasin kategorive të fishekzjarrëve ose artikujve piroteknikë teatralë dhe që paraqesin rrezik të ulët;

1.3.2. kategoria P2 – artikuj piroteknikë që nuk u përkasin kategorive të fishekzjarrëve ose artikujve piroteknikë teatralë, të cilët kanë për qëllim të përdoren ose trajtohen vetëm nga persona me njohuri të specializuara.

Neni 34

Kufizimi i shitjes së artikujve piroteknikë

1. Artikujt piroteknikë të kategorisë F1, F2 dhe F3 nga neni 33 i këtij ligji mund t’ju shiten personave si në vijim:

1.1. kategoria F1: nga dymbëdhjetë (12) vjet;

1.2. kategoria F2: nga gjashtëmbëdhjetë (16) vjet;

1.3. kategoria F3: nga tetëmbëdhjetë (18) vjet;

1.4. kategoria T1 dhe P1: nga tetëmbëdhjetë (18) vjet.

2. Operatorët ekonomikë sipas dispozitave të këtij ligji, u shesin ose u vënë në dispozicion vetëm personave me njohuri të specializuara artikujt e mëposhtëm piroteknikë:

- 2.1. fishekzjarrët e kategorisë F4;
- 2.2. artikujt piroteknikë teatralë të kategorisë T2;
- 2.3. artikujt e tjerë piroteknikë të kategorisë P2.

3. Është e ndaluar shitja e fishekzjarrëve në vende dhe hapësira publike si rrugë, sheshe, tregje dhe të ngjashme.

4. Artikujt e tjerë piroteknikë të kategorisë P1 për automjetet, përfshirë jastëkët e ajrit dhe sistemet e vendosjes së rripave të sigurisë, nuk i vihen në dispozicion publikut të gjerë përveçse kur janë të inkorporuara në automjet ose në një pjesë të ndarë të automjetit.

Neni 35

Gjurmueshmëria e produkteve piroteknike

1. Për lehtësimin e gjurmueshmërisë së artikujve piroteknikë, prodhuesit i etiketojnë ato me një numër regjistrimi që caktohet nga organi evropian i vlerësimit që kryen vlerësimin e përputhshmërisë sipas përcaktimeve të këtij ligji.

2. Prodhuesi dhe importuesi mbajnë dhe ruajnë deri në dhjetë (10) vjet regjistrat e numrave të artikujve piroteknikë që vendosin në treg dhe këtë informacion e vendosin në dispozicion të autoriteteve të mbikëqyrjes së tregut, sipas kërkesës.

3. Rregullat dhe procedurat e krijimit të sistemit të gjurmimit të artikujve piroteknikë përcaktohen me akt nënligjor të miratuar nga Ministri i MPB-së.

Neni 36

Etiketimi i artikujve piroteknikë

1. Prodhuesit garantojnë që artikujt piroteknikë të etiketohen në gjuhën zyrtare në mënyrë të dukshme, të lexueshme dhe të pashlyeshme. Etiketimi duhet të jetë i qartë, i kuptueshëm dhe i thjeshtë.

2. Etiketimi i artikujve piroteknikë përfshin minimalisht informacionin për prodhuesin, siç parashikohet në nenin 44 paragrafi 10 të këtij ligji. Në rast se prodhuesi nuk ndodhet në Republikën e Kosovës duhet të jepet informacioni për prodhuesin dhe importuesin lidhur me:

- 2.1. emrin dhe llojin e artikullit;
- 2.2. numrin e tij të regjistrimit dhe të produktit;
- 2.3. numrin e ngarkesës ose të serisë;
- 2.4. kufijtë minimal të moshës, siç përcaktohet në këtë ligj;

- 2.5. kategorinë përkatëse dhe udhëzimet për përdorim;
 - 2.6. vitin e prodhimit për kategoritë F3 dhe F4 dhe, kur është e përshtatshme, largësinë minimale të sigurisë;
 - 2.7. SNSH-në e lëndës plasëse.
3. Për fishekzjarrët duhet të vendoset në etiketë të paktën informacioni i mëposhtëm:
- 3.1. kategoria F1: “Për përdorim në ambient të brendshëm dhe të jashtëm” dhe “Largësia/largësitë minimale të sigurisë”;
 - 3.2. kategoria F2: “Vetëm për përdorim në ambient të jashtëm” dhe, sipas rastit, “Largësia/largësitë minimale të sigurisë”;
 - 3.3. kategoria F3: “Vetëm për përdorim në ambient të jashtëm” dhe “Largësia/largësitë minimale të sigurisë”;
 - 3.4. kategoria F4: “Të përdoret vetëm nga persona me njohuri të specializuara” dhe “Largësia/largësitë minimale të sigurisë”.
4. Artikujt piroteknikë teatralë të përmbajnë informacionin minimal si më poshtë:
- 4.1. kategoria T1: “Për përdorim në ambient të brendshëm dhe të jashtëm” dhe “Largësia/largësitë minimale të sigurisë”;
 - 4.2. kategoria T2: “Të përdoret vetëm nga persona me njohuri të specializuara” dhe “Largësia/largësitë minimale të sigurisë”.
5. Nëse vetë artikulli piroteknikë nuk ka hapësirë të mjaftueshme për plotësimin e kërkesave të etiketimit, sipas këtij neni, ky informacion vendoset në ambalazhin e paketimit më të vogël.

Neni 37

Etiketimi i artikujve piroteknikë për automjetet

1. Etiketimi i artikujve piroteknikë për automjete përfshin informacionin për prodhuesin, siç përcaktohet në nenin 44 paragrafi 10 të këtij ligji si dhe:
 - 1.1. emrin dhe llojin e artikullit piroteknikë;
 - 1.2. numrin e tij të regjistrimit dhe produktit;
 - 1.3. numrin e ngarkesës apo të serisë dhe, kur është e nevojshme, udhëzimet për sigurinë.

2. Nëse artikulli piroteknikë nuk ka hapësirë të mjaftueshme për kërkesat e etiketimit sipas paragrafit 1 të këtij neni, informacioni vendoset tek ambalazhi.

Neni 38 **Procedura e vlerësimit të përputhshmërisë**

1. Për vlerësimin e përputhshmërisë së artikujve piroteknikë, prodhuesi ndjek një nga procedurat:

1.1. procedurën e kontrollit të BE-së bazuar në lloj, sipas zgjedhjes së operatorit ekonomik:

1.1.1. kontrollin e brendshëm të produktit, si edhe kontrollet shtesë të mbikëqyrjes në intervale rastësore;

1.1.2. sigurinë e cilësisë së procesit të prodhimit;

1.1.3. sigurinë e cilësisë së produktit.

1.2. procedurën për verifikimin i njësisë së produktit;

1.3. procedurën për sigurinë e plotë e cilësisë për fishekzjarrët e kategorisë F4.

2. Procedura për vlerësimin e përputhshmërisë përcaktohet me akt nënligjor të nxjerrë nga Ministri i MPB-së.

Neni 39 **Vlerësimi i përputhshmërisë**

1. Vlerësimi i përputhshmërisë së artikujve piroteknikë bëhet nga vetë prodhuesi nëpërmjet organit evropian të vlerësimit të përputhshmërisë, kompetent për kryerjen e detyrave specifike të vlerësimit të përputhshmërisë së produktit për vendosjen e shenjës CE.

2. Kur një organ evropian i vlerësimit tregon përputhshmërinë me kriteret e përcaktuara në standardet e harmonizuara, vërteton që artikulli piroteknik përmbush të gjitha standardet e sigurisë për t'u hedhur në treg.

Neni 40 **Deklarata e përputhshmërisë**

1. Deklarata e përputhshmërisë e hartuar nga operatori ekonomik për lëndët plasëse duhet të përmbajë kriteret thelbësore të sigurisë dhe sipas formatit të përcaktuar me akt nënligjor të nxjerrë nga Ministri i MPB-së.

2. Operatori ekonomik me nënshkrimin e deklaratës së përputhshmërisë merr përsipër përgjegjësinë për përputhshmërinë e produktit sipas dispozitave të këtij ligji.

Neni 41

Rregullat dhe kushtet për vendosjen e shënimit CE dhe shënimet e tjera

1. Shenja CE duhet të vendoset në mënyrë të dukshme tek artikulli piroteknikë, të jetë e lexueshme dhe e pashlyeshme.
2. Kur kjo është e pamundur, shenja vendoset në ambalazh dhe në dokumentet shoqëruese.
3. Shenja CE duhet të fiksohet përpara se artikulli piroteknikë të vendoset në treg.
4. Shenja CE shoqërohet nga një numër identifikimi i organit evropian të vlerësimit të përputhshmërisë, i cili është përfshirë në fazën e kontrollit të prodhimit.
5. Numri i identifikimit vendoset nga vetë organi ose, sipas udhëzimeve të tij, nga ana e prodhuesit ose përfaqësuesit të autorizuar të këtij të fundit.
6. Shenja CE dhe numri identifikues i organit evropian të vlerësimit të përputhshmërisë, kur është e mundur, shoqërohet edhe nga një shenjë tjetër që tregon rrezik ose përdorim të veçantë.
7. Për zbatimin e këtij neni Ministri nxjerr akt nënligjor.

Neni 42

Leja për testimin e artikujve piroteknikë

1. Operatori ekonomik ose prodhuesi mund të kryejë teste të artikujve piroteknikë për nevojat e tyre profesionale në procedurën e vlerësimit të përputhshmërisë pasi të ketë marrë lejen për testim.
2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:
 - 2.1. të ketë të angazhuar persona të kualifikuar që do të trajtojnë lëndët plasëse gjatë testimit;
 - 2.2. të ketë të lejen e posedimit apo të përdorimit të laboratorit për testim të artikujve piroteknikë;
 - 2.3. të ketë pronësinë, apo të drejtën për të përdorur hapësirën ose objektin për testimin e artikujve piroteknikë në vendin ku kryhet testimi;
 - 2.4. të ketë pronësinë, ose të drejtën për të përdorur magazinën për qëllime të përcaktuara;
 - 2.5. të ketë leje të magazinimit, ose dëshmi të posedimit të një magazine të përkohshme të ndërtuar brenda laboratorit të testimit.

3. Operatori ekonomik që kryen testimin e artikujve piroteknikë duhet të njoftojë MPB-në për marrjen e mostrave të artikujve piroteknikë për qëllime të testimit jo më vonë se shtatëdhjetedy (72) orë para testimit.

4. Nëse një operator ekonomik ka lejen për prodhim të artikujve piroteknikë, mund të kryejë teste të artikujve piroteknikë me qëllim të kontrollit të prodhimit të tij pa leje për testim.

Neni 43

Leja për prodhim të artikujve piroteknikë

1. Operatori ekonomik mund të fillojë prodhimin e artikujve piroteknikë, pasi të jetë pajisur me leje për prodhim të artikujve piroteknikë.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të jetë i pajisur me lejen për magazinë të sigurtë;

2.2. të ketë persona të autorizuar dhe të kualifikuar për prodhim;

2.3. të paraqesë të dhënat për llojin e artikujve piroteknikë që planifikohen të prodhohen;

2.4. të paraqesë të dhënat për procesin dhe teknologjinë e prodhimit;

2.5. të jetë i pajisur me lejen e ndërtimit për objektet ku prodhohen artikujt piroteknikë;

2.6. të ketë planin emergjent për vendin e prodhimit;

2.7. të ketë planin e sigurisë së vendprodhimit;

2.8. të ketë kryer vlerësimin e rrezikut;

2.9. të ketë vlerësimin e ndikimit në mjedis.

3. Leja për prodhimin e artikujve piroteknikë inspektohet rregullisht për përmbushjen e kriterëve ligjore të përcaktuara me këtë ligj me qëllim që të sigurojë mbrojtjen e shëndetit dhe jetës së personave, si dhe mbrojtjen e pronës dhe mjedisit.

4. MPB vendos brenda tridhjetë (30) ditëve në lidhje me kërkesën.

Neni 44

Detyrimet e prodhuesve të artikujve piroteknikë

1. Prodhuësit, kur hedhin në treg artikujt piroteknikë, sigurohen që ata të jenë projektuar dhe prodhuar në përputhje me kriteret kryesore të sigurisë.

2. Prodhuesit hartojnë dokumentacionin teknik për artikujt piroteknikë të prodhuar dhe ndjekin procedurën e përshtatshme të vlerësimit të përputhshmërisë sipas nenit 38 të këtij ligji.
3. Pasi të jetë ndjekur procedura e vlerësimit të përputhshmërisë sipas nenit 38 të këtij ligji, prodhuesi harton një deklaratë të përputhshmërisë dhe vendos shenjen CE.
4. Prodhuesit e ruajnë dokumentacionin teknik dhe deklaratën e përputhshmërisë së BE-së për një periudhë dhjetë (10) vjeçare, pasi artikulli piroteknik vendoset në treg.
5. Prodhuesit sigurohen që zbatimi i procedurave për prodhimin në seri të bëhet në përputhje me dispozitat e këtij ligji.
6. Modifikimet në projektim ose ato të lidhura me karakteristikat e artikullit piroteknik, si dhe ndryshimet në standardet e harmonizuara apo ndryshimet e specifikimeve të tjera teknike duhet të reflektohen në dokumentacionin shoqërues të produktit.
7. Prodhuesit, në varësi të rrezikut që paraqet një artikull piroteknik, me qëllim mbrojtjen e shëndetit dhe të sigurisë së konsumatorëve, në vijim të kërkesës së arsyetuar tek MPB dhe pas marrjes së miratimit përkatës, kryejnë testimin e mostrës së artikujve piroteknikë që janë vendosur në treg.
8. Për artikujt e vendosur në treg prodhuesit hulumtojnë dhe mbajnë një regjistër të ankesave, ku regjistrojnë gjithashtu edhe artikujt piroteknikë që nuk plotësojnë kriteret e sigurisë, si dhe rastet e kthimit të artikujve piroteknikë. Prodhuesit janë të detyruar të informojnë shpërndarësit me përmbajtjen e regjistrit.
9. Prodhuesit sigurohen që artikujt piroteknikë të vendosur në treg të etiketohen sipas neneve 36 dhe 37 të këtij ligji.
10. Prodhuesit tek çdo artikull piroteknikë vendosin:
 - 10.1. emrin e tyre;
 - 10.2. emrin e regjistruar tregtar ose markën e regjistruar tregtare;
 - 10.3. adresën postare.
11. Në rast se vendosja e të dhënave sipas paragrafit 10 të këtij neni është e pamundur, këto të dhëna vendosen te paketimi i tij ose te një dokument shoqërues i artikullit piroteknikë.
12. Adresa tregon një vendndodhje të vetme ku mund të kontaktohet prodhuesi.
13. Të dhënat duhet të jenë në gjuhë zyrtare.
14. Prodhuesit sigurohen që artikulli piroteknikë të shoqërohet nga të dhënat për mënyrën e përdorimit, të mirëmbajtjes dhe rreziqet që lidhen me përdorimin e tyre, në gjuhët zyrtare. Të

dhënat për mënyrën e përdorimit, të mirëmbajtjes dhe rreziqet që lidhen me përdorimin e tyre, si edhe etiketimi duhet të jenë të kuptueshme dhe të qarta.

15. Prodhuesit që konsiderojnë se artikulli piroteknikë, të cilin ata e kanë vendosur në treg nuk është në përputhje me këtë ligj, marrin menjëherë masat e domosdoshme për rregullimin e mospërputhshmërisë dhe nëse është e nevojshme, e kthejnë ose tërheqin artikullin nga tregu.

16. Në rast se ky artikull piroteknikë paraqet rrezik, prodhuesit informojnë autoritetet kompetente të mbikëqyrjes së tregut duke dhënë hollësi, sidomos për mospërmbushjen e kriterëve dhe për masat korrektuese të ndërmarra.

17. Në rast të një kërkesës nga MPB, prodhuesi duhet të ofrojë të gjithë informacionin dhe dokumentacionin me shkrim ose elektronike që nevojitet për të demonstruar përputhshmërinë e artikullit piroteknikë me dispozitat e këtij ligji.

18. Prodhuesit duhet të bashkëpunojnë me strukturat e mbikëqyrjes së tregut për çdo veprim të ndërmarrë për eliminimin e rreziqeve që paraqitet nga artikujt piroteknikë që cilët kanë vendosur në treg.

19. Në fazën e projektimit të repartit për prodhimin e artikujve piroteknikë prodhuesit duhet t'i nënshtrohen procedurës së vlerësimit të ndikimit në mjedis si dhe të sigurojnë lejet përkatëse mjedisore për prodhimin e artikullit piroteknikë përpara vënies në punë, në përputhje me kërkesat e legjislacionit në fuqi për vlerësimin e ndikimit në mjedis dhe të atij për lejet e mjedisit. Modifikimet në projektim ose në instalimet e prodhimit, që janë të lidhura me karakteristikat/standardet e harmonizuara të artikullit piroteknikë apo ndryshimet në specifikimet teknike, duhet të jenë pjesë e vlerësimit të ndikimit në mjedis dhe lejes përkatëse të mjedisit.

Neni 45

Leja për kërkim dhe hulumtim të artikujve piroteknikë

1. Prodhuesit e artikujve piroteknikë si dhe institucionet shkencore mund të bëjnë kërkim dhe hulumtim të artikujve piroteknikë pasi të jenë pajisur me leje për kërkim dhe hulumtim të artikujve piroteknikë.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. operatori ekonomik duhet të jetë i regjistruar në regjistrin shtetëror, ose personi përgjegjës duhet të bëjë pjesë në institucionin shkencor që ka veprimtarinë e regjistruar për të cilën është kërkuar leja;

2.2. personi përgjegjës duhet të ketë të përfunduar shkollim universitar në fushën e shkencave të natyrës apo teknike;

2.3. të ketë të drejtën e shfrytëzimit të objektit në të cilin do të kryhet kërkimi dhe hulumtim i artikujve piroteknikë;

2.4. të jetë i pajisur me leje përdorimi për objektin në të cilin do të bëhet magazinimi i artikujve piroteknikë;

2.5. të jetë i pajisur me lejen e përdorimit për objektin në të cilin ndodhet magazinimi i përkohshëm;

2.6. të ketë raportin teknologjik mbi procedurën e kërkimit dhe hulumtimit;

2.7. të plotësojnë kriteret nga neni 11, paragrafët 1, 2, 3 dhe 6 të këtij ligji;

2.8. të kenë sistem të vetin të kontrollit të cilësisë.

3. Prodhuesit e artikujve piroteknikë, të cilët kanë leje të vlefshme prodhuese nuk kanë nevojë të përmbushin kriteret nga paragrafi 2, nënparagrafi 2.8. i këtij neni.

Neni 46

Leja për import, eksport, transit dhe transferim të artikujve piroteknikë

1. Operatori ekonomik mund të fillojë aktivitetin e importit, eksportit, transitit dhe transferimit të artikujve piroteknikë vetëm pasi të jetë pajisur me leje për import, eksport, transit dhe transferim të artikujve piroteknikë nga ministria.

2. Përveç kriterëve të përgjithshme, duhet të plotësohen edhe kriteret e veçanta si në vijim:

2.1. të ketë lejen e importit ose transitit të vendit në të cilin artikujt piroteknikë janë duke u eksportuar ose përmes së cilit është duke u bërë transiti i tyre;

2.2. të ketë certifikatën e përdoruesit të fundit;

2.3. të ketë licencën për transport rrugor për mallra të rrezikshme të lëshuar nga ministria përkatëse e mjedisit;

2.4. të ketë leje për magazinim të artikujve piroteknikë.

3. Operatori ekonomik bashkë me kërkesën duhet të ofrojë edhe informatat si në vijim:

3.1. emrin e artikujve piroteknikë dhe numrin identifikues të KB-së;

3.2. emrin dhe adresën e prodhuesit;

3.3. emrin dhe adresën e shitësit ose dërguesit të artikujve piroteknikë;

3.4. emrin dhe adresën e blerësit ose pranuesit të artikujve piroteknikë;

3.5. emrin dhe adresën e vozitësit të automjetit, tipin e automjetit dhe numrin e targave të automjetit;

- 3.6. sasinë e artikujve piroteknikë;
 - 3.7. tabelën e të dhënave të sigurisë;
 - 3.8. informatat identifikuese të artikujve piroteknikë;
 - 3.9. datën dhe kohën e importit, eksportit, transitit dhe transferimit;
 - 3.10. kohën dhe vendin e ndalesave të parashikuara;
 - 3.11. hyrjen dhe daljen në kalimin kufitar dhe formën e transportit nëse është e aplikueshme;
 - 3.12. qëllimin e transferimit, nëse është e mundshme.
4. Leja për eksport, transit dhe transferim vlen në afatin kohor prej tridhjetë (30) ditësh.
 5. Leja për import, vlen në afatin kohor prej nëntëdhjetë (90) ditësh.
 6. MPB me akt nënligjor përcakton masat e veçanta të sigurisë për import, eksport apo kalim transit nëpër territorin e Republikës së Kosovës.
 7. Në rast të rrezikimit të sigurisë publike dhe për të parandaluar posedimin dhe përdorimin ilegal të artikujve piroteknikë, MPB mund të kufizojë ose të ndalojë importin, eksportin, transitin ose transferimin e tyre, në tërë territorin, ose në një pjesë të territorit të Kosovës.

Neni 47

Detyrimet e importuesve të artikujve piroteknikë

1. Importuesit vendosin në treg vetëm artikujt piroteknikë që përmbushin kriteret e përputhshmërisë.
2. Përpara hedhjes në treg të artikujve piroteknikë, importuesit sigurohen që:
 - 2.1. prodhuesi të ketë kryer procedurat e vlerësimit të përputhshmërisë sipas përcaktimeve të këtij ligji;
 - 2.2. prodhuesi të ketë hartuar dokumentacionin teknik;
 - 2.3. artikulli piroteknikë të ketë të vendosur shënjimin CE;
 - 2.4. artikulli piroteknikë të shoqërohet me dokumentet e nevojshme për hedhjen në treg;
 - 2.5. prodhuesi të ketë plotësuar kriteret e përcaktuara në nenin 44 të këtij ligji.

3. Kur importuesi vlerëson se një artikull piroteknikë nuk është në përputhje me kërkesat kryesore të sigurisë të përcaktuara me këtë ligj, nuk e vendos në treg artikullin piroteknikë derisa të jetë në përputhje me kriteret e përputhshmërisë.

4. Në rast se artikulli piroteknikë paraqet rrezik, importuesi informon prodhuesin dhe MPB-në për rrezikun.

5. Importuesit duhet të vendosin të dhënat si në vijim në artikujt piroteknikë:

5.1. emrin e importuesit;

5.2. emrin e regjistruar tregtar ose markën e regjistruar tregtare;

5.3. adresën ku mund të kontaktohen.

6. Nëse vendosja e të dhënave sipas paragrafit 5 të këtij neni nuk është e mundur, importuesi i vendos ato në paketim apo në një dokument shoqërues të artikullit piroteknik.

7. Importuesit sigurohen që artikulli piroteknikë të shoqërohet nga udhëzimet dhe informacioni për sigurinë në gjuhë zyrtare.

8. Importuesit sigurohen që gjatë kohës që artikulli piroteknikë është nën përgjegjësinë e tyre, kushtet e magazinimit ose të transportit nuk rrezikojnë përmbushjen e kriterëve të sigurisë të përcaktuara me këtë ligj.

9. Në rast se një artikull piroteknikë paraqet rrezik, importuesit për të mbrojtur shëndetin dhe sigurinë e konsumatorëve, me kërkesë nga autoritetet kompetente, kryejnë testimin e mostrës së artikujve piroteknikë që kanë vendosur në treg, mbajnë një regjistër të ankesave dhe kthimeve për artikujt piroteknikë që nuk përmbushin kriteret e sigurisë dhe i mbajnë shpërndarësit të informuar me përmbajtjen e regjistrit.

10. Importuesit që vlerësojnë se artikulli piroteknikë i hedhur në treg nuk është në përputhje me dispozitat e këtij ligji, menjëherë marrin masat e nevojshme korigjuese për ta sjellë në përputhje me kërkesat, për ta tërhequr ose për ta kthyer, nëse është e nevojshme.

11. Importuesit duhet të mbajnë një kopje të deklaratës së përputhshmërisë deri në dhjetë (10) vjet pas daljes në treg të artikullit piroteknikë, të cilën e vënë në dispozicion të autoriteteve të mbikëqyrjes menjëherë pas kërkesës.

12. Importuesit e artikujve piroteknikë, kur u kërkohet nga MPB, ofrojnë në formë shkresore ose elektronike të gjithë informacionin dhe dokumentacionin që nevojitet për të provuar përputhshmërinë e artikullit piroteknikë me dispozitat e këtij ligji.

13. Importuesit e artikujve piroteknikë bashkëpunojnë me MPB-në për çdo veprim të ndërmarrë për eliminimin e rrezikut që paraqitet nga artikujt piroteknikë, të cilët i kanë vendosur në treg.

Neni 48

Detyrimet e shpërndarësve të artikujve piroteknikë

1. Shpërndarësit, para hedhjes në treg të artikullit piroteknikë, duhet të verifikojnë nëse artikulli piroteknikë:

1.1. ka shënjimin CE;

1.2. shoqërohet me dokumentet e nevojshme;

1.3. ka udhëzimet dhe informacionet e sigurisë në gjuhë zyrtare.

2. Shpërndarësit sigurojnë që për aq kohë sa artikulli piroteknikë është nën përgjegjësinë e tyre, kushtet e magazinimit apo të transportit nuk cenojnë përputhshmërinë dhe përmbushjen e kriterëve të sigurisë sipas dispozitave të këtij ligji.

3. Kur shpërndarësit vlerësojnë se artikulli piroteknikë i vendosur në treg nuk është në përputhje me dispozitat e këtij ligji, ata sigurojnë marrjen e masave korrigjuese të nevojshme për ta sjellë atë në përputhje me përputhshmërinë, për ta tërhequr apo për ta kthyer atë, sipas rastit. Në rast se artikulli piroteknikë paraqet rrezik, shpërndarësit informojnë menjëherë MPB-në, duke përfshirë detajet, në veçanti ato të mospërputhjes apo të masave korrigjuese të ndërmarra.

4. Shpërndarësit bazuar në kërkesën e MPB-së, paraqesin të gjithë informacionin dhe dokumentacionin e nevojshëm në formë shkresore ose elektronike për të provuar përputhshmërinë e artikullit piroteknikë.

5. Shpërndarësit, kur u kërkohet bashkëpunojnë me MPB-në për çdo veprim të ndërmarrë për eliminimin e rrezikut që paraqitet nga artikujt piroteknikë, të cilët i kanë vendosur në treg.

Neni 49

Detyrimet e veçanta

Një importues ose shpërndarës i artikujve piroteknikë konsiderohet prodhues për qëllim të këtij ligji dhe i nënshtrohet detyrimeve të prodhuesit sipas nenit 44 të këtij ligji, kur vendos në treg një artikull piroteknikë nën emrin ose markën e tij, apo kur ndryshon një artikull piroteknikë tashmë të vendosur në treg në masë të tillë që cenon dispozitat e këtij ligji.

Neni 50

Shitja me pakicë dhe përdorimi i artikujve piroteknikë

1. Operatorët ekonomikë dhe personat fizikë mund të shesin me pakicë artikujt piroteknikë të kategorive F1, F2, F3, P1 dhe T1 në dyqanet e artikujve piroteknikë që janë të pajisur me leje nga MPB.

2. Personat e përfshirë në shitje në këto dyqane duhet të jenë të aftë dhe të kenë kualifikimet teknike për ushtrimin e këtij aktiviteti.

3. Koha e shitjes dhe përdorimit i artikujve piroteknikë të kategorive F2 dhe F3 përcaktohet në akt nënligjor.
4. Ndalohet përdorimi në ambiente të brendshme ose në hapësira të populluara i artikujve piroteknikë të kategorive F2, F3, T1 dhe P1.
5. Nuk lejohet shitja apo përdorimi i artikujve piroteknikë të kategorive F4, P1, P2, T1 dhe T2 për qytetarët.
6. Lejohet shitja dhe përdorimi i artikujve piroteknikë të kategorive F2, F3, T1 dhe P1, të cilët përdoren për qëllime të shpëtimit të njerëzve, kafshëve, transportin rrugor, hekurudhor, ajror, ujor, teatër, bujqësi dhe aktivitete të ngjashme gjatë gjithë vitit nga persona që i paraqesin një dëshmi shitësit lidhur me ushtrimin e aktivitetit për të cilin blihen këta artikuj ose vërtetim të pronësisë së mjetit lundrues për blerjen e artikujve piroteknikë të kategorisë P1.
7. Qytetarët mund të mbajnë artikuj të kategorive F1, F2 dhe/apo F3, me peshë maksimale bruto deri në njëzet (20) kg artikuj piroteknikë.
8. Lejohet shitja me pakicë e artikujve piroteknikë të kategorisë F1 nga dyqanet që kanë leje nga MPB gjatë gjithë vitit.
9. Në kioskë lejohet mbajtja e artikujve piroteknikë të kategorisë F1, me peshë maksimale bruto deri në tridhjetë (30) kg artikuj piroteknikë.
10. Në dyqane të tjera lejohet mbajtja e artikujve piroteknikë të kategorisë F1, F2 dhe F3, me peshë maksimale bruto deri në njëqind e pesëdhjetë (150) kg artikuj piroteknikë.
11. Sasi më të mëdha të artikujve piroteknikë të kategorisë F1, F2 dhe F3 mund të mbahen në përputhje me dispozitat për magazinimin e artikujve piroteknikë.
12. Për zbatimin e këtij neni, Ministri i MPB-se nxjerr akt nënligjor.

Neni 51

Leja për asgjësimin e artikujve piroteknikë

1. Operatori ekonomik mund të fillojë aktivitetin e asgjësimit të artikujve piroteknikë pasi të jetë pajisur me leje për asgjësim të artikujve piroteknikë.
2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:
 - 2.1. të ketë të punësuar personin përgjegjës të kualifikuar dhe certifikuar për përdorim, prodhim apo për asgjësim;
 - 2.2. të ketë të caktuar vendin e asgjësimit të miratuar nga MPB;
 - 2.3. të tregohet procedura e asgjësimit, e miratuar nga MPB;

2.4. plani i asgjësimit, i miratuar nga MPB.

3. Leja për asgjësim është e vlefshme për një (1) apo më shumë ditë, sipas aprovimit nga MPB.

4. Asgjësimi kryhet me njërin nga metodat e mëposhtme, në varësi nga përbërja e lëndës, rreziqe e tij, lloji dhe vendndodhja:

4.1. djegia;

4.2. detonimi;

4.3. shpërbërja; ose

4.4. tretja me tretës kimik.

5. Groposja dhe hedhja në lumenj dhe liqene e artikujve piroteknikë është rreptësisht e ndaluar.

6. MPB vendos në lidhje me kërkesën brenda tridhjetë (30) ditëve.

Neni 52

Leja për magazinim të artikujve piroteknikë

1. Operatori ekonomik mund të bëjë magazinimin e artikujve piroteknikë pasi të jetë pajisur me lejen për magazinim.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të ketë lejen e ndërtimit për objekte të lëshuara nga autoriteti kompetent;

2.2. të ketë planin e projektit të projektuar nga studio projektuese sipas ligjit përkatës për ndërtim;

2.3. të ketë skemën e hollësishme të vendit të magazinimit;

2.4. të ketë bërë vlerësimin e rrezikut për magazinim të hartuar nga persona fizikë apo juridikë të certifikuar;

2.5. të ketë planin e sigurisë të hartuar nga persona fizikë apo juridikë të certifikuar;

2.6. të ketë listën për llojin e artikujve piroteknikë që magazinohen sipas numrit KB dhe sasisë së propozuar.

3. Objektet për artikujt piroteknikë duhet të ndërtohen në mënyrë të tillë që garantojnë mbrojtjen e jetës dhe shëndetit të njerëzve, pronës, kafshëve dhe mjedisit.

4. Sasia e lejuar e ruajtjes së artikujve piroteknikë në lokacion caktohet sipas standardeve të udhëzuesit ndërkombëtar teknik për municione dhe klasifikimit të rrezikshmërisë me akt nënligjor të miratuar nga Ministri i MPB-së.

5. Vendndodhja e magazinimit inspektohet rregullisht për përmbushjen e kriterëve ligjore të lejes me qëllim që të sigurojë mbrojtjen e shëndetit dhe jetës së personave, kafshëve si dhe mbrojtjen e pronës dhe mjedisit.

6. MPB vendos në lidhje me kërkesën brenda tridhjetë (30) ditëve.

Neni 53

Leja për ndezje profesionale të artikujve piroteknikë

1. Operatori ekonomik mund të fillojë aktivitetin e ndezjes së artikujve piroteknikë të kategorisë F4, T2 dhe P2, pasi të pajiset me leje për përdorim profesional të artikujve piroteknikë të kategorisë F4, T2 dhe P2.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të paraqesë hartën e lokacionit ku planifikohet shfaqja e artikujve piroteknikë;

2.2. të ketë plan emergjent, miratuar nga MPB;

2.3. të ketë të angazhuar persona të certifikuar për përdorim të artikujve piroteknikë për kategoritë F4, T2 dhe P2.

3. Para aprovimit të lejes për shfaqje inspektohet lokacioni nga inspektorët e MPB-së dhe në bazë të raportit të inspektimit merret vendimi për lejim ose jo të shfaqjes.

4. Leja është e vlefshme për aq ditë sa përcaktohet në miratimin e MPB-së.

5. MPB ka të drejtë me akt administrativ të ndalojë përdorimin dhe shitjen e artikujve piroteknikë kur është e nevojshme gjatë periudhave të thatësirave klimatike dhe kur rreziku i zjarrit është në nivel shumë të lartë.

6. MPB vendos në lidhje me kërkesën brenda tridhjetë (30) ditëve.

Neni 54

Leja për dyqan të shitjes me pakicë të artikujve piroteknikë

1. Operatori ekonomik mund të fillojë aktivitetin për shitjen e artikujve piroteknikë me pakicë në dyqan, pasi të pajiset me leje për dyqan të shitjes me pakicë të artikujve piroteknikë.

2. Leja nga paragrafi 1 i këtij neni i lëshohet operatorit ekonomik pasi t'i ketë plotësuar kriteret e përgjithshme dhe kriteret e veçanta si në vijim:

2.1. të jetë i pajisur me leje për magazinim, të lëshuar nga MPB;

- 2.2. të ketë të angazhuar një person të kualifikuar;
 - 2.3. të ketë planin emergjent për vendndodhjen e shitjes me pakicë;
 - 2.4. të ketë planin e sigurisë së vendndodhjes.
3. MPB vendos në lidhje me kërkesën brenda tridhjetë (30) ditëve.
 4. Për zbatimin e këtij neni, Ministri i MPB-së nxjerr akt nënligjor.

Neni 55

Artikujt piroteknikë që paraqesin rrezik publik

1. Kur MPB ka arsye të mjaftueshme për të besuar se artikulli piroteknikë paraqet rrezik për shëndetin ose sigurinë e personave, kafshëve, mallrave ose mjedisit, atëherë vlerësimi i artikullit piroteknikë bëhet duke iu referuar kriterëve të përcaktuara sipas dispozitave të këtij ligji.
2. Nëse gjatë vlerësimit sipas paragrafit 1 të këtij neni konstatohet se artikulli piroteknikë nuk përmbush kriteret e këtij ligji, MPB i kërkon menjëherë operatorit ekonomik përgjegjës të marrë të gjitha masat korigjuese të domosdoshme për ta sjellë artikullin piroteknikë në përputhje me këto kërkesa, ta tërheqë nga tregu brenda njëzet (20) ditësh, në përputhje me natyrën e rrezikut, të përcaktuar nga autoriteti i mbikëqyrjes së tregut.
3. Në rast se MPB ose organi tjetër kompetent konstaton se mospërputhja nuk kufizohet vetëm në territorin e Republikës së Kosovës, ata njoftojnë edhe autoritetet homologe të tyre në shtetet e tjera për rezultatet e vlerësimit dhe për veprimet që i kanë kërkuar të ndërmarrë operatorit ekonomik.
4. Në rast se operatori ekonomik nuk merr masat e duhura korigjuese brenda periudhës së caktuar sipas paragrafit 2 të këtij neni, MPB merr vendim lidhur me masat e ndalimit, urdhëron tërheqjen nga tregu ose kthimin në origjinë.
5. MPB sigurohet që masa kufizuese e tërheqjes së artikullit piroteknikë nga tregu të zbatohet menjëherë.
6. Në rast se operatori ekonomik nuk është dakord me masën e marrë nga paragrafi 5 i këtij neni, mund të paraqes ankesë me shkrim brenda tridhjetë (30) ditëve nga njoftimi i masës.

Neni 56

Rregullimi i mospërputhshmërisë

1. MPB i kërkon operatorit ekonomik të rregullojë mospërputhshmërinë kur konstaton se:
 - 1.1. shënjimi CE është vendosur në kundërshtim me dispozitat e këtij ligji;
 - 1.2. shënjimi CE nuk është vendosur;

1.3. numri i identifikimit të organit të vlerësimit të përputhshmërisë në rastet kur ai organ është i përfshirë në fazën e kontrollit të prodhimit, është dhënë në kundërshtim me këtë ligj ose nuk është dhënë fare;

1.4. nuk është hartuar deklarata e përputhshmërisë;

1.5. deklarata e përputhshmërisë nuk është hartuar në mënyrë të saktë;

1.6. dokumentacioni teknik ose nuk është i disponueshëm ose është i mangët;

1.7. dokumentacioni i parashikuar në lidhje me gjurmimin apo kriteret e sigurisë mungon, është i pasaktë ose është i mangët;

1.8. nuk përmbushen kriteret e përcaktuara në nenin 44 dhe 47 të këtij ligji.

2. Në rast se mospërputhshmëria e përcaktuar në paragrafin 1 të këtij neni vazhdon, MPB merr të gjitha masat e nevojshme për të kufizuar apo për të ndaluar vendosjen në treg të artikullit piroteknikë, ose për t'u siguruar që ky artikull të tërhiqet nga tregu.

Neni 57

Ndalimi i tregtimit të produkteve dhe bllokimi

1. MPB mund të vendos të ndalojë përkohësisht hedhjen e produktit në treg në rastet kur:

1.1. ka dyshime se produkti nuk përmbush kriteret kryesore ose kriteret e tjera të sigurisë së artikullit piroteknikë;

1.2. produkti nuk ka shenjën CE, është shënjuar në mënyrë të paligjshme ose nuk është shoqëruar me dokumentacionin e përcaktuar në legjislacionin në fuqi;

1.3. është konstatuar rasti i mospërputhshmërisë sipas nenit 56 në paragrafin 1 të këtij ligji dhe operatori ekonomik nuk ka përmbushur masat e urdhëruara brenda afatit kohor të vendosur nga MPB ose organet e tjera relevante dhe produkti mund të paraqesë rrezik për përdoruesin e fundit;

1.4. prodhimi, magazinimi, përdorimi ose tregtimi mund të paraqesë rrezikshmëri;

1.5. autoritetet kompetente në vende të tjera të Bashkimit Evropian kanë njoftuar se produkti është i rrezikshëm apo nuk është në përputhje me kërkesat ligjore të përcaktuara për produktin.

2. Vendimi i ndalimit të përkohshëm mund të shoqërohet, nëse është e nevojshme, me detyrimin e operatorit ekonomik për lajmërimin e përdoruesit të fundit për rrezikun.

3. MPB shfuqizon vendimin për ndalimin e përkohshëm të tregtimit kur operatori ekonomik dëshmon se ai plotëson kriteret e përcaktuara me këtë ligj.

4. MPB urdhëron ndalimin e përhershëm të tregtimit në qoftë se kontrollet ose testimet provojnë se artikulli piroteknikë paraqet rrezik, ose nuk është në përputhje me kërkesat përkatëse të sigurisë ose kur pavarësisht përputhshmërisë, ai mund të rrezikojë sigurinë e jetës, shëndetit, kafshëve, mjedisit ose interesave të tjera publike.

5. Vendimi për ndalimin e tregtimit mund të merret nga MPB kur:

5.1. të njëjtat masa janë marrë nga shtetet anëtare të Bashkimit Evropian, ku është tregtuar produkti;

5.2. prodhuesi, përfaqësuesi i autorizuar ose importuesi kanë njoftuar se produkti është i rrezikshëm ose nuk është në përputhje me legjislacionin përkatës.

6. Vendimi nga paragrafi 5 të këtij neni shoqërohet me një ose me disa nga masat e mëposhtme:

6.1. lajmërimin e përdoruesve të fundit, duke përdorur mjetet e përshtatshme të komunikimit publik për rrezikun që paraqet artikulli piroteknikë;

6.2. urdhërimin për ndalimin e menjëhershëm të tregtimit në qoftë se produkti është tashmë në treg ose tërheqjen nga tregu të tij;

6.3. urdhërimin e bërjes jofunksional të artikullit piroteknikë ose asgjësimin e tij.

7. Lajmërimi i klientëve dhe i përdoruesve të fundit, si dhe kthimi i artikullit piroteknikë duhet të kryhet nga operatori ekonomik nën mbikëqyrjen e MPB-së.

8. Në rast se masat e marra nga operatorët ekonomikë konsiderohen si të pamjaftueshme, veprimet e sipërpërmendura kryhen nga MPB dhe shpenzimet mbulojnë nga operatori ekonomik.

9. Asgjësimi i produktit ose bërja jofunksionale kryhet nga operatori ekonomik në përputhje me legjislacionin në fuqi për menaxhimin e integruar të mbetjeve nëpërmjet operatorëve të certifikuar për asgjësimin e këtij produkti. Shpenzimet mbulojnë nga operatori ekonomik.

KAPITULLI VI PEZULLIMI DHE SHFUQIZIMI I LEJEVE

Neni 58 Pagesat për pajisje me leje

1. Ministri me akt administrativ përcakton kufirin maksimal të shpenzimeve për secilën procedurë administrative sipas llojeve të lejeve të përcaktuara me këtë ligj.

2. Pagesa lidhur me lejet të cilat lëshohen sipas dispozitave të këtij ligji, nuk do të kalojë shumën e nevojshme për të mbuluar shpenzimet që i dalin autoritetit kompetent për të administruar lejimin.

Neni 59

Transferimi lejeve

Lejet e përcaktuara sipas nenit 12 të këtij ligji, lejohen të transferohen sipas kushteve dhe procedurës së përcaktuar në ligjin përkatës për leje dhe licenca.

Neni 60

Ndryshimi i lejeve

1. Në rast të ndryshimit të kriterëve në bazë të cilave është marrë leja përkatëse sipas këtij ligji, operatori ekonomik duhet të njoftojë MPB-në brenda tetë (8) ditësh nga data e ndryshimit.

2. Leja mund të ndryshohet nga MPB-ja, pa pajtim të operatorit ekonomik të cilit i është lëshuar leja.

3. MPB mund të ndryshojë lejen vetëm nëse përcakton se ndryshimi është në interes të administrimit efektiv të këtij ligji dhe e njofton poseduesin e lejes me shkrim në lidhje me vendimin dhe ndryshimin.

4. Poseduesi i lejes mund të bëjë kërkesë në ministri për ndryshim të lejes.

5. MPB vendos mbi kërkesën për ndryshim në afat prej tetë (8) ditësh.

6. Nëse MPB vendos për mos ndryshimin e lejes sipas këtij neni duhet menjëherë ta njoftojë me shkrim poseduesin e lejes në lidhje me:

6.1. vendimin;

6.2. arsyetimin për vendimin;

6.3. të drejtën për ankesë sipas ligjit përkatës për procedurën administrative.

Neni 61

Pezullimi dhe shfuqizimi i lejeve

1. Pezullimi dhe shfuqizimi i lejeve të lëshuara sipas këtij ligji bëhet në pajtim me ligjin përkatës për leje dhe licenca.

2. Për aq sa përcaktohet në këtë ligj, kundër secilit vendim për refuzim, pezullim dhe shfuqizimin të një leje apo një vendimi tjetër përfundimtar sipas këtij ligji, lejohet ankesa në pajtim me rregullat e përcaktuara në ligjin përkatës për procedurën administrative.

3. Organ epror që shqyrton ankesat sipas këtij neni është Komisioni i Ankesave i themeluar me vendim të Ministrit.

4. Përbërja, detyrat, përgjegjësitë dhe procedura e vendimmarrjes së komisionit përcaktohen me akt nënligjor të nxjerrë nga Ministri.

KAPITULLI VII REGJISTRAT

Neni 62

Regjistri i lëndëve plasëse dhe artikujve piroteknikë

1. MPB regjistron të gjitha kërkesat nga operatorët ekonomikë, dokumentet e lëshuara dhe informatat tjera të nevojshme për zbatimin e dispozitave të këtij ligji ose ato për bashkëpunim me autoritetet tjera relevante.

2. MPB menaxhon dhe mirëmban bazë të të dhënave në formatin elektronik për lëndët plasëse dhe artikujt piroteknikë, me të dhënat si në vijim:

2.1. për regjistrimet për prodhim, shitje, import, eksport, transit, transferim, magazinim dhe përdorim;

2.2. për lejet e revokuara për prodhim, shitje, import, eksport, transit, transferim, magazinim dhe përdorim;

2.3. për lejet e lëshuara;

2.4. emrin dhe adresën e operatorit ekonomik dhe të personit përgjegjës;

2.5. adresën e vendndodhjes ku prodhohen, magazinohen ose përdoren lëndët plasëse apo artikujt piroteknikë;

2.6. llojin e rrezikut dhe sasinë maksimale të lëndëve plasëse apo artikujve piroteknikë që mund të magazinohen njëkohësisht në vendndodhje;

2.7. llojin e lëndëve plasëse dhe artikujve piroteknikë të prodhuar ose të magazinuar;

2.8. planin ku tregohen distancat ndarëse ose kushtet e sigurisë që duhet të mbahen rreth depove dhe objekteve ku prodhohen lëndët plasëse dhe artikujt piroteknikë;

2.9. hartën që tregon vendndodhjen e depove;

2.10. llojin e depove ku ruhen lëndët plasëse apo artikujt piroteknikë;

2.11. të dhënat e lëndëve plasëse me udhëzuesit për përdorim, për të cilën është dhënë leja nga MPB.

3. MPB dërgon gjithë informacionin e nevojshëm lidhur me lejet në regjistrin qendror për lejet dhe licencat, në përputhje me ligjin përkatës për leje dhe licenca.

4. Të dhënat ruhen me qëllim që lëndët plasëse dhe artikujt piroteknikë të identifikohen dhe gjurmohen. Të dhënat do të ruhen për dhjetë (10) vite.

Neni 63

Regjistri i operatorit ekonomik

1. Operatori ekonomik duhet të vendos dhe të mirëmbajë të dhënat e përditësuara në vend të sigurtë për dhjetë (10) vite nga data e regjistrimit të të dhënave të fundit.

2. Operatori ekonomik që bën prodhimin, shitjen, importin, eksportin, transitin, transferimin apo përdorimin e lëndëve plasëse apo artikujve piroteknikë, duhet patjetër të regjistrojë llojet dhe sasinë e lëndëve plasëse apo artikujve piroteknikë të blerë, shitur, asgjësuar apo të kthyer. Të dhënat duhet të ruhen së paku dhjetë (10) vite.

3. Të dhënat sipas paragrafit 1 të këtij neni përfshijnë si në vijim:

3.1. deklaratën e përshtatshmërisë;

3.2. specifikat teknike të lëndës plasëse;

3.3. udhëzuesit për prodhim, përdorim, magazinim dhe asgjësim;

3.4. shënjimin e klasës së produkteve plasëse;

3.5. shenjën me të dhënat për siguri.

KAPITULLI VIII

INCIDENTE DHE AKSIDENTE

Neni 64

Raportimi i lëndëve plasëse dhe artikujve piroteknikë të humbura

1. Operatorët ekonomikë duhet të raportojnë menjëherë në MPB dhe në Polici, në rast të humbjes së lëndëve plasëse apo artikujve piroteknikë.

2. Raportimi sipas paragrafit 1 të këtij neni përmban të dhënat si në vijim:

2.1. datën dhe kohën kur është zbuluar humbja;

2.2. vendin ku është zbuluar;

2.3. përshkrimin e çdo lloji të lëndëve plasëse apo artikujve piroteknikë që kanë humbur;

2.4. sasinë e lëndëve plasëse apo artikujve piroteknikë të humbur.

Neni 65

Raportimi i incidenteve dhe aksidenteve

Operatorët ekonomikë që janë përfshirë në incident apo aksident me lëndë plasëse apo artikuj piroteknikë, duhet të njoftojnë menjëherë MPB dhe Policinë me njoftimin verbal të përcjellë me shkrim për incidentin dhe humbjen e jetës, lëndimet personale ose dëmtimet e pronës të shkaktuara nga incidenti apo aksidenti.

Neni 66

Hetimi i incidenteve dhe aksidenteve

1. Inspektorët duhet të hetojnë incidentin apo aksidentin me lëndët plasëse apo artikuj piroteknikë në bashkëpunim me Policinë, ndërsa në rastet e incidentit apo aksidentit me lëndë plasëse në miniera, në hetim përfshihet edhe autoriteti kompetent për miniera.

2. Operatori ekonomik duhet të sigurojë mosndërhyrjen deri sa të përfundojnë veprimet si në vijim:

- 2.1. fotografimi i vendit;
- 2.2. matjet e nevojshme të vendit;
- 2.3. lista e dëshmitarëve që kanë qenë prezent.

3. Për zbatimin e këtij neni, Ministri i MPB-së nxjerr akt nënligjor.

KAPITULLI IX

DISPOZITAT NDËSHKUESE

Neni 67

Gjobat

1. Inspektori gjobit në shumën prej shtatëmijë e pesëqind (7500) euro operatorin ekonomik që:

1.1. përfshihet në testimin e lëndëve plasëse apo artikujve piroteknikë ose me aktivitetet që kanë të bëjnë me procesin e vlerësimit të përputhshmërisë pa pajisjen me leje nga ministria sipas nenit 25 dhe nenit 47 të këtij ligji;

1.2. prodhon ose shet lëndë plasëse apo artikuj piroteknikë, të cilat nuk janë shënuar sipas nenit 16 dhe nenit 36 të këtij ligji;

1.3. prodhon lëndë plasëse apo artikuj piroteknikë pa leje për prodhimin e tyre sipas nenit 18 paragrafi 1, nënparagrafi 1.2 të këtij ligji;

1.4. nuk e informon stacionin më të afërm të policisë rreth lëndëve plasëse apo artikujve piroteknikë të vjedhur ose të humbur sipas nenit 65 të këtij ligji.

2. Me gjobë prej pesëmijë (5000) Euro për kundërvajtje do të dënohet operatori ekonomik, i cili:

2.1. sipas nenit 11 paragrafi 2 të këtij ligji nuk miraton një rregullore të përgjithshme që të përmbajë planin e veprimit për masat e sigurisë ose nuk vepron në përputhje me këtë rregullore;

2.2. sipas nenit 11 paragrafi 3 të këtij ligji nuk ua njofton masat e parashikuara në rregullore të gjithë personave që kryejnë aktivitetet me lëndë plasëse apo artikuj piroteknikë për llogari të tij, ose nuk u ofron atyre trajnimin për të vepruar në rast incidenti apo aksidenti;

2.3. nuk garanton mbrojtje të përhershme fizike ose teknike të ambienteve për prodhimin, magazinimin e lëndëve plasëse apo artikujve piroteknike sipas nenit 11 paragrafi 4 të këtij ligji;

2.4. lejon përdorimin e lëndëve plasëse apo artikujve piroteknikë nga persona pa kualifikim përkatës sipas nenit 18 paragrafi 1 dhe nënparagrafi 2.4 i paragrafit 2, të këtij ligji;

2.5. lejon një person të përfshihet në aktivitete ndihmëse për prodhimin, tregtimin, transportimin, magazinimin ose përdorimin e lëndëve plasëse apo artikujve piroteknikë në kundërshtim me nenin 10 paragrafi 5 të këtij ligji;

2.6. deponon lëndë plasëse apo artikuj piroteknikë në objekte që nuk janë të dedikuara për magazinimin e tyre ose i ruan ato në sasi që tejkalojnë kapacitetin maksimal të depos sipas nenit 29 dhe nenit 52 të këtij ligji;

2.7. i shet lëndë plasëse operatoreve ekonomikë të cilët nuk kanë leje, në kundërshtim me nenin 30 paragrafin 3, të këtij ligji;

2.8. transferon lëndë plasëse apo artikuj piroteknikë pa lejen përkatëse sipas nenit 29 dhe nenit 51 të këtij ligji;

2.9. mban artikuj piroteknikë në tejkalim të sasisë maksimale sipas nenit 50 paragrafi 9 të këtij ligji;

2.10. mban artikuj piroteknikë që tejkalojnë sasinë maksimale sipas nenit 50 paragrafi 10 të këtij ligji;

2.11. është përgjegjës për mbajtjen e të dhënave për gjurmimin e lëndëve plasëse apo artikujve piroteknikë të cilat janë në kundërshtim me nenin 13 dhe nenin 35 të këtij ligji;

2.12. nuk merr të gjitha masat e sigurisë gjatë operacioneve të shpërthimit sipas nenit 26 paragrafi 1 të këtij ligji dhe nuk i kryen ato operacione në përputhje me planin e shpërthimit;

2.13. pengon inspektorin që të kryejë mbikëqyrjen inspektuese sipas nenit 7 të këtij ligji, nuk i siguron atij qasje në dokumentacionin e kërkuar, apo nuk i jep informacionin dhe të dhënat e nevojshme.

3. Me gjobë prej njëmijë (1000) Euro për kundërvajtje do të dënohet operatori ekonomik, i cili:

3.1. pas përdorimit të lëndës plasëse, sipas nenit 26 paragrafi 4 të këtij ligji, nuk kujdeset për kthimin e lëndëve plasëse të papërdorura në depo me paketimin e tyre fillestar ose nuk i asgjëson ato sipas udhëzimeve të prodhuesit;

3.2. ambalazhin e synuar për paketimin e lëndëve plasëse apo artikujve piroteknike e përdor për qëllime të tjera;

3.3. nuk e njofton menjëherë MPB-në për humbjen ose vjedhjen e lëndëve plasëse apo artikujve piroteknike sipas nenit 66 paragrafi 1 të këtij ligji;

3.4. transferon dhe përdor lëndë plasëse apo artikuj piroteknike në ambalazh që nuk është paketuar, testuar dhe shënjuar në përputhje me rregulloret që rregullojnë transportin e mallrave të rrezikshme dhe rregulloret për shënjimin e lëndëve plasëse sipas nenit 12 paragrafi 3 dhe nenit 32 paragrafi 3 të këtij ligji;

3.5. nuk mban të dhëna për dokumentacionin teknik, deklaratat e përputhshmërisë, sistemin e gjurmimit sipas afateve të përcaktuara në këtë ligj sipas neneve 13, 15, 35 dhe 40 të këtij ligji;

3.6. nuk ia kthen lëndët plasëse prodhuesit ose nuk i shkatërron ato me shpenzimet e tij brenda 30 ditëve nga data e njoftimit për pezullimin e lejes së tregtimit apo të përdorimit të lëndëve plasëse;

3.7. mban lëndë plasëse apo artikuj piroteknike të cilat nuk janë në përputhshmëri sipas neneve 17 dhe 39 të këtij ligji;

3.8. deponon lëndë plasëse apo artikuj piroteknike në depo të përkohshme për ndërtimin dhe shfrytëzimin e të cilave nuk është marrë leja përkatëse sipas nenit 29 dhe nenit 52 të këtij ligji;

3.9. deponon lëndët plasëse apo artikujt piroteknike në sasi që tejkalojnë kapacitetin e lejuar për ruajtjen e lëndëve plasëse sipas nenit 29 paragrafi 3 dhe nenit 52 paragrafi 4 të këtij ligji;

3.10. nuk njofton MPB-në në rast ndryshimesh në lidhje me transportin e lëndëve plasëse apo artikujve piroteknike, menjëherë pas ndryshimit.

3.11. për shitjen e artikujve piroteknike nëse angazhon persona pa kualifikime teknike sipas nenit 50 paragrafi 2 të këtij ligji.

KAPITULLI X
DISPOZITAT KALIMTARE DHE PËRFUNDIMTARE

Neni 68
Vlefshmëria e licencave ekzistuese

Licencat ekzistuese janë të vlefshme deri në skadim të afatit të tyre.

Neni 69
Aktet nënligjore

1. Për zbatimin e këtij ligji, në afat prej një (1) viti, nga hyrja në fuqi e këtij ligji, duhet të nxirren aktet nënligjore të parapara me këtë ligj.

2. Për aq sa nuk janë në kundërshtim me këtë ligj, deri në miratimin e akteve nënligjore tjera për zbatimin e këtij ligji, vazhdojnë të zbatohen aktet.

Neni 70
Shfuqizimi

Me hyrjen në fuqi të këtij ligji, shfuqizohet Ligji Nr. 04/L-022 për përdorim civil të eksplozivëve dhe çdo dispozitë tjetër në kundërshtim me të.

Neni 71
Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 10/L-024
23 prill 2026

Shpallur me dekretin Nr. DL-54/2026, datë 05.05.2026 nga u.d. Presidentes së Republikës së Kosovës Albulena Haxhiu